

TUTÚ QUIHIⁿ NDAHA CUE ÑÁYIU HÈBREÚ

Dútú Ndiõxí ní cachí-gá sá Dèhe-gá cada núú-gă

¹ Te ndéé sanaha, Yá Ndiõxí ní xáhaⁿ-gă xii cue téé ní cachí iní méé-gă cada núú-gă cáháⁿ-güedé tnúhu-gá núú nchàa ñaní tnáhá-ó nǐ xindecu ndéé dàvá-áⁿ te ñu ducaⁿ nǐ quide-güedé. Te titní xito ducaⁿ nǐ xáhaⁿ-gă xii-güedé ní cáháⁿ-güedé tnúhu-gá. Te ndi ñíⁿ ndi ñíⁿ nǐ xítñúhu ñaha-gă xii-güedé nàcuáa cáháⁿ-güedé tnúhu-gá núú-yu. ² Te sáta nǐ cuu vâi nduu ta yáha cuáháⁿ, te ní sáa nduu nǐ cachí Yá Ndiõxí sá Dèhe-gá cada núú-gă cáháⁿ tnúhu-gá núú-ó. Te ñu-ni mee-gă ní táúchíúⁿ nǐ cadúha Déhe-gá ñuyíú ndihí nchaa sá íó, te ní cachí-gá sá ncháá cùu-xi cuendá Déhe-gá. ³ Te Déhe Yá Ndiõxí ío càhnu cuu-gá dàtná càhnu cuu mee-gá, te dàtná-ni sàni iní méé-gă ñu-ni ducaⁿ sàni iní Déhe-gá chi tnáhá-gá cúú-gă Ndiõxí, te sá cuendá tnúhu càháⁿ Déhe-gá xíáⁿ ndécú-ní nchàa sá íó ñuyíú, te ducaⁿ chi ío càhnu cuu Déhe-gá, te ñu-ni Déhe-gá ní quide nàcuáa vá cündecu-gá cuéchi-o. Te sáta dúcáⁿ te ní ngóo-gá xio cùha Tátá-gă Dútú Ndiõxí Yaá ío cùnnu ndecu andiú.

*Déhe Dútú Ndiõxí ío-gá cúnùu-gá dàcúúxí cuè
espíritú xínú cuèchi núú-gă*

⁴ Te Déhe Yá Ndiõxí ío-gá cúnùu-gá dàcúúxí cuè espíritú xínú cuèchi núú-gă, te ducaⁿ chi ní nduu táhú-gă núú Tátá-gă Dútú Ndiõxí sá ío-gá cunuu-gă

dàcúúxí cuè espíritú-áⁿ. ⁵ Chi Yá Ndiöxí ñá túú ní xáhaⁿ-gã xii ni ñⁿ cue espíritú xínú cuèchi núú-gã dàtná ní xáhaⁿ-gã xii Déhe-gá, te duha ní xáhaⁿ-gã:

Yòhó cúú-n Déhe mee-ï,

te ducaⁿ-ni cùndecu-n núú ndécù-í.

Duha ní xáhaⁿ-gã. Te ní cachí tucu Yá Ndiöxí:

Yúhú cúù-í Tătă Yàá-ãⁿ,

te mee-gã cúú-gã Déhe-í.

Duha ní cachí-gá. ⁶ Te cútnàhá ní tendaha-gã

Déhe-gá Yaá ío cùnuu ní quixi-gá ñuyíú-a, te ní cachí-gá:

Tàú-xi sá ncháá cuè espíritú xínú cuèchi núù-í chiñuhu-xi Déhe-í.

Duha ní cachí-gá. ⁷ Te Yá Ndiöxí ní cáháⁿ-gá cuendá cue espíritú xínú cuèchi núú-gã, te ní cachí-gá:

Yúhú quidè-í sá ncháá cuè espíritú xínú cuèchi núù-í cúú-xí dàtná táchí,

te ñu-ni cue espíritú-áⁿ quidè-í sá cúú-xí dàtná itá ñuhú.

Duha càchí-gá. ⁸ Dico Déhe-gá chi ñá túú dùcaⁿ ni xáhaⁿ-gã, chi duha ní xáhaⁿ-gã:

Yòhó tnhá-n cùu-n Ndióxí dàtná cúú yúhú Yaá cúú Tătă-n,

te ducaⁿ-ni tàxi tnuní-n ñi caa ñi quíhíⁿ,

te ío váha ndáá quidé-n tàxi tnuní-n.

⁹ Te dàquee tihú-n nchàa sá cuèhé sá dúhá, te cùu iní-n nchàa sá vãha,

núu xiãⁿ yúhú Yaá cúú Tătă-n ñi quide-í sá ïo-gá vii ío-gá váha cuu iní-n,

dàcúúxí nchàa dava-gá ñáyiú ndècu ndíhi-n.

Duha ní xáhaⁿ-gã xii Déhe-gá. ¹⁰ Te ní xáhaⁿ tucu Yá Ndiöxí xii Déhe-gá:

Yòhó cúú-n Yàá ío cùnuu, chi ndéé cútnàhá ñá túú vèdana ná íó te ní cadúha-n ñùyíú ndìhi andìu.

11 Te andìu ndìhi ñùyíú chi naa-xi, dico yòhó chi cundecu-ni-n nì caa ni quíhíⁿ.

Te andìu ndìhi ñùyíú chi ndìhi-xi dàtná ndíhí ìⁿ dóó,

12 te dàtná cuíní-n quìde ñáyíu ndìhi ìⁿ dóó òré ndàcáⁿ tnáhnũ-yu tàxi ndecú-yu ìⁿ xio, ducaⁿ càda-n ñùyíú ndìhi andìu,

te dàtná nádăma dóó ñáyíu ducaⁿ càda tucu-n ñùyíú ndìhi andìu.

Te yòhó dàtná-ni càa-n ndecu-n vitna ducaⁿ-ni cùnduu-n cundecu-n ni caa ni quíhíⁿ, chi vá yíí tnàhí-n.

Duha ní xáhaⁿ Yă Ndiõxí xii Déhe-gá. 13 Te Yá Ndiõxí ñá túú ní xăhaⁿ-gă xii ni ìⁿ cue espíritú xínú cuèchi núú-gă dàtná ní xáhaⁿ-gă xii Déhe-gá, te duha ní xáhaⁿ tùcu-gá:

Ngóo xio cùha-í taxi tnùní-n,

te yúhú cada-í te nchaa sá cúú ũhú iní ñáhá xii-n canehe-xi sá yíñùhu núú-n.

Duha ní xáhaⁿ-gă xii Déhe-gá. 14 Te nchaa espíritú xínú cuèchi núú Yă Ndiõxí mee-ni chiúⁿ-gá quídé-xí, chi tëndaha-gá cue espíritú-áⁿ cuăháⁿ-xi nchaa núú ndécú cuè ñáyíu ní nduu táhú cundecu ndìhi-gá chindee ñàha-xi xí-yu.

2

Vá dáñá ndéé-ó tnũhu sá càháⁿ nàcuáa naníhí tànhú-ó

1 Te sá cuèndá sá ïo cùnunu Xítóhó Jesucrìstú, núu xíǎⁿ ío xìnì ñuhu-xi cada cuendá-ó nchaa tnúhu càháⁿ-gá sá sà ní xíndedóho-o cuèndá sá vǎ dáñá ñihnu-o. 2 Te cue espíritú xínú cuèchi núú Yǎ Ndiǒxí ní cáháⁿ-xi tnúhu-gá ndéé sanaha, te tnúhu ní cáháⁿ cue espíritú-áⁿ cúú-xí sǎ ndáá cuítì. Te nchaa ñáyiú ñá túú ní cuìní tñi nchaa tnúhu ní cáháⁿ cue espíritú-áⁿ, te ni ñà túú ní cuìní-yu cund-edóho-yu, nchaa ñáyiú-áⁿ ñi nacháhu-yu nàcuáa ndùu nchaa cuèchi ní quidé-yu ñi ñi-yu. 3 Te sá dúcáⁿ ñi yáha cue ñáyiú-áⁿ, xíǎⁿ cútnùní ndáá iní-ó sǎ vǎ cǎcu ñihnu-o te núu na dàña ñihnu-o tnúhu sá càháⁿ nàcuáa naníhí tàhú-ó, tnúhu sá ïo cùnunu, chi nacháhu-o te núu ducaⁿ na càda-o. Te díhna-gá Xítóhó Jesucrìstú ní cáháⁿ-gá tnúhu-áⁿ te nchaa ñáyiú ní xíndedóho nchaa nàcuáa ndùu tnúhu-áⁿ ñi cáháⁿ ndáá-yu tnúhu-áⁿ nùú-ó. 4 Te tnàhá Yǎ Ndiǒxí cúndìhi-gá nchaa ñáyiú-áⁿ quidé-gǎ nàcuáa cutnùní iní-ó sǎ tnúhu-áⁿ cúú-xí tnúhu ndáá, chi quide-gá títí núú sǎ vǎ yǒ tnàhí ndàcu cada te ío cùñúhu-o. Te Espíritú Yǎ Ndiǒxí quidé-xí nàcuáa nduu táhú-ó ndì dííⁿ nùú chiuⁿ cada-o nacuáa cuìní méé-gǎ. Te sá dúcáⁿ quide Yá Ndiǒxí nchaa xíǎⁿ, xíǎⁿ cútnùní iní-ó sǎ tnàhá-gá càháⁿ-gá sá tnúhu-áⁿ cúú-xí tnúhu ndáá.

Xítóhó Jesucrìstú ní xínduu yiqui cùñú-gá dàtná cáá yiqui cùñú nchoo cuè ñáyiú ñuyú-a

5 Te Yá Ndiǒxí vá táxí ndècu-gá cue espíritú xínú cuèchi núú-gǎ taxi tnùnì-xi ñuyúú sáá sǎ vǎtá quìnì-gá-ó, te diu cuèndá xíǎⁿ càháⁿ-í. 6 Te núú tùtú Yǎ Ndiǒxí càhí-xi:

Yòhó Dútú Ndiõxí ñá túú nă cúú cuè ñáyiu ñuyíú
nũu ndacu iní-n-yu, àdi chindeé-n-yu.

⁷ Te yòhó ní cachí-n sǎ nchàa ñáyiu ñuyíú-a vá
cúnùú-yu dàtná cúnùu cue espíritú xínú
cuèchi núú-n,

dico ní cachí-n sǎ sàá nduu te ío cunùú-yu
tnàhá-yu, te mee-n cǎháⁿ-n sǎ ïo cǎhnu
cuú-yu,

te ní cachí tucu-n sǎ táxí tnùní-yu nchaa sá ñ
cadúha-n.

⁸ Te ducaⁿ nchàandi túhú sá ío quíndàhá-yu.

Duha cǎchí-xi núú tútú-gá. Te sá dúcáⁿ ñ cachí Yǎ
Ndiõxí sá quíndàha ñáyiu ñuyíú nchaa sá ío, xǎⁿ
cútnùní sá ncháándi túhú sá ío taxi tnùní-yu, dico
vátá sàá-gá nduu dùcaⁿ quíní-ó càda-xi. ⁹ Te nchoo
sa nàha-o sá tnáá-ní ñ quide Yá Ndiõxí cuendá
sá vǎ cúnùu Xítóhó Jesucristú dàtná cúnùu cue
espíritú xínú cuèchi núú-gǎ. Te ducaⁿ ñ quide Yá
Ndiõxí chi ní cundàhú iní-gá nchaa ñáyiu ñuyíú-a,
chi ní cachí-gá sá Dèhe-gá cuú cuendá nchaa-yu, te
Xítóhó Jesucristú ío ní ndoho-gá òré ní xíhí-gá, núu
xǎⁿ ní nduu táhú-gǎ cúnùu vihi-gá vitna. Te mee
Yǎ Ndiõxí cǎchí-gá sá ïo cǎhnu cuu Déhe-gá.

¹⁰ Te Yá Ndiõxí ní cadúha-gá nchaandi túhú sá ío
nàcuáa ní cachí iní méé-gǎ, te sá dúcáⁿ ñ quide-gá
nũu xǎⁿ váha-ni sá ñ cachí-gá sá Xítóhó Jesu-
cristú nándi ndoho-gá te cuú-gá cuendá ducaⁿ ñà
túú tnàhí-gá ná cùmání-gǎ núú Yǎ Ndiõxí. Te sá
dúcáⁿ ñ cuu núu xǎⁿ ní níhí Yǎ Ndiõxí nàcuáa
cada-gá cǎndeca-gá nchaa ñáyiu cùu déhe-gá quíhíⁿ
núú ïo váha cǎa cundecú-yu ndihí-gá ñi caa ñi
quíhíⁿ. Te Xítóhó Jesucristú cúú-gǎ Yaá ní quide

nàcuáa nduu táhú cue ñáyiú cundecú-yu ndihi Yá Ndiöxí. ¹¹ Te Xítohó Jesucristú cúú-gã Yaá quidé ndècu yiñuhu ñáyiú núú Yã Ndiöxí ñáyiú sàndáá iní ñáhá xii-gá, te Xítohó Jesucristú ndihi cue ñáyiú-áⁿ ñⁿ-ni Yáá cúú Tãtã-yu ndihi-gá, núú xíãⁿ Xítohó Jesucristú Yaá cúú Dèhe Dútú Ndiöxí ñá túú cùcahaⁿ núú-gã càháⁿ-gá sá ñàní-gá ndihi cúha-gá cúú nchàa ñáyiú-áⁿ. ¹² Te quèe ndáá-xi nàcuáa càháⁿ-xi núú tùtú Yã Ndiöxí núú càchí-xi nàcuáa ní xáhaⁿ Xítohó Jesucristú xii Tátá-gã Dútú Ndiöxí, te duha ní xáhaⁿ-gã:

Cáháⁿ váha-í cuendá-n núú nchàa cue tée cùu datná ñàní-í ndihi núú nchàa cue ñáyiú ñíhí cúú dàtná cúha-í,

te cata-í ndudú chiñuhu ñaha-í xii-n núú tàcá-yu. Duha yòdo tnuní núú tùtú-gá nàcuáa ní xáhaⁿ Dèhe-gá xii-gá. ¹³ Te ñngá tucu xichi núú tùtú Yã Ndiöxí càháⁿ-xi nàcuáa ní cáháⁿ Xítohó Jesucristú cuendá-gá, te duha ní cachí-gá:

Yúhú nchaa-ni nduu quindáá iní-í Tãtã-í Dútú Ndiöxí.

Duha càchí-xi núú tùtú Yã Ndiöxí nàcuáa ní cáháⁿ Xítohó Jesucristú. Te ñngá tucu xichi núú tùtú Yã Ndiöxí càháⁿ-xi nàcuáa ní cáháⁿ tucu Xítohó Jesucristú, te duha ní cachí-gá:

Iha ndècu ndihi-í nchaa ñáyiú cùu déhe Tãtã-í Dútú Ndiöxí, te ñíu-ni ñáyiú-áⁿ ñí taxi cuendá Tãtã-í cuu cuendá-í.

Duha càchí-xi núú tùtú-gá nàcuáa ní cáháⁿ Xítohó Jesucristú.

¹⁴ Te sá cuendá nchaa ñáyiú cùu déhe Yá Ndiöxí cúú-yu yiqui cùñú, núú xíãⁿ ducaⁿ tnàhá Xítohó Jesucristú ní cuu-gá yiqui cùñú, te ducaⁿ ñí

cuu-gá yiqui cùñú cuèndá cuú-gá, te sá dúcáⁿ cùú-gá te ndacu-gá daquèe tíhú-gă sácuihná, te ñiu sácuihná-ăⁿ quidé-xí xihí ñáyiú. ¹⁵ Te ducaⁿ ñi quide-gá cuèndá sá cuè ñáyiú ñuyíú-a vá yùhú-gá-yu sá cùú-yu, chi nchaa-ni nduu yùhú-yu sá cùú-yu. ¹⁶ Te na càchí tnúhu ndáá-í sá Xítohó Jesucristú ní quixi-gá cuèndá chindee-gă cue ñáyiú cùu ñaní tnáhá ndi Àbrahám, te ñá díú cuèndá sá chindèe-gá cue espíritú xínú cuèchi núú Yă Ndiöxí. ¹⁷ Te cuèndá xiăⁿ nũu dai ní xini ñuhu-xi sá cúú-gă ñáyiú cuèndá yăha-gá nãndi sá yăha-gá dàtná yăha cue ñáyiú cùu ndi mee-gá cuèndá ducaⁿ cùu-gá dútú ïo cùnũu te cuu ndáá-gá núú Yă Ndiöxí, te cundàhú iní-gá nchaa ñáyiú te cuú-gá cuèndá sá vă cùndècu-gá cuèchi-yu núú Yă Ndiöxí. ¹⁸ Te mei òré ndóhó Xítohó Jesucristú ní xito ndéé ñáhá sàcuihná xii-gá te núu ndisa sá vă cáda-gă ni ñⁿ sá ñà túú tàú-gá cada-gá, te sá dúcáⁿ ñi ndoho-gá xiăⁿ nũu ndácú-gă chindèe-gá nchaa ñáyiú ducaⁿ yăha.

3

Xítohó Jesucristú ïo-gá cùnũu-gá dàcúúxi ndi Moisés

¹ Te nchòhó cúú-ndó ñáyiú ndècu ndihi-í ichi Xítohó Jesucristú ñáyiú cùu cuendá Yă Ndiöxí, te tnáhá-ndó cùu-ndo ñáyiú ní cáháⁿ ñáhá-gă cuèndá cundecu-ndo ndihi-gá. Te yúhú càchí tnúhu-í xii-ndo sã ïo váha cada cuèndá-ndó nãcuáa ndũu cuendá Xítohó Jesucristú, chi ñiu-gá cúú-gă Yaá ní tendaha ñàha Dútú Ndiöxí ní quixi-gá ñuyíú-a, te ñiu-gá cúú-gă Dútú ïo cùnũu chi quide-gá núú Yă Ndiöxí. Te ñiu-ni cuèndá Xítohó Jesucristú càháⁿ

tnúhu sá ni sàndáá iní-ó. ² Te mee Yă Ndiöxí ní sáha chiuⁿ-gá Xítohó Jesucristú, te ío ndáá quidé-gă chiuⁿ-áⁿ sá cúú-xí Yă Ndiöxí, te diu-ni ducaⁿ nĩ quide ndíi Moisés ní quide ndíi chiuⁿ ní táhú Yă Ndiöxí, te ío ndáá ní quide ndíi chiuⁿ-gá sá cúú-xí nchàa ñáyiu cùu cuendá-gá, te cue ñáyiu-áⁿ cúu-yu dàtná vehe mee-gă. ³ Te ìⁿ tée dàcaa ìⁿ vehe váha ío càhnu-gá cúú-dě dàcúxí vèhe dacao-dé. Te ducaⁿ sãtnhá-xi cùu Xítohó Jesucristú chi ío-gá càhnu cuu-gá dàcúxí ndíi Moisés. ⁴ Te nchoo sã naha-o sá ncháá vèhe dacuití ndècu cue téé ní dácáá, dico sa nàha tucu-o sá Yă Ndiöxí quidé-gă ndécú nchàa sá ío ñuyú-a. ⁵ Te ndíi Moisés-áⁿ ìo ndáá ní quide ndíi chiuⁿ ní táhú Yă Ndiöxí ní quide ndíi sá cúú-xí nchàa ñáyiu cùu cuendá-gá. Te sá dúcáⁿ nĩ quide ndíi xíáⁿ ní cuu ndíi ìⁿ téé ní xinu cuechi nũú Yă Ndiöxí. Te ní xáhaⁿ ndíi xii nchaa ñáyiu cùu cuendá-gá nàcuáa cáháⁿ-gá ndéé cuéé-gá. ⁶ Dico Xítohó Jesucristú cúú-gă Déhe mee Yă Ndiöxí, te cùu-gá Yaá ío quide ndáá yíndàha-gá nchaa ñáyiu cùu cuendá Yă Ndiöxí. Te tnàhá-ó cùu-o ñáyiu cùu cuendá-gá, te diu-ni ducaⁿ cùu cuendá ñáhá-gă xii-o te núu na càchicúⁿ nihnu-ni-o càni ndáá iní-ó cuendá-gá ndéé ná sàá nduu ngündecu-o ndíi-gá.

Cue ñáyiu cùu cuendá Yă Ndiöxí ío váha cùu iní-yu ndécú-yu ndíi-gá

⁷ Te núú tütú Yă Ndiöxí yódó tnùní nàcuáa ní cáháⁿ Espíritú-gá, te duha ní cachí-xi:

Te núu nchòhó ndèdóho-ndo nchàa tnúhu càháⁿ Yă Ndiöxí vitna,

8 te vá cúndùu sáá iní-ndó dàtná ní xínduu sàá iní ñáyiu ní dáquéé tǎhú tnǎhu Yá Ndiǒxí, ñáyiu ní xíndecu xítí yucu, chi ñáyiu-áⁿ ñǎ xito ndeé-yu Yá Ndiǒxí nǎu nása cada ñaha-gǎ xíí-yu.

Duha ní cachí Espíritú-gá. 9 Te cǎchí tucu Espíritú Yǎ Ndiǒxí nǎcuáa ní cáháⁿ méé-gǎ, te duha ní cachí-gá:

Xítí yucu ní xito ndeé ñáhá cuè ñaní tnáhá-ndó ñǎ xíndecu ndeé sanaha xíí-í, te ducaⁿ ñǎ quide ñàhá-yu cuèi ní xiní-yu nchaa sá ñǎ quide-í ndǎ ùdico cuíá ñǎ xíndecú-yu xítí yucu-áⁿ.

10 Te sá dúcáⁿ ñǎ quidé-yu núu xíǎⁿ ní cudèèⁿ-í núǎ-yu,

núu xíǎⁿ ní cáháⁿ-í cuèndá-yu, te ní cachí-í:

“Ñáyiu-a quide-ní-yu nchaa sá ñà túú tàú-yu cadá-yu te ni ñà túú cuení-yu cadá-yu nchaa nǎcuáa sàni iní-í,

te ni ñà túú cuení-yu cadá-yu nǎcuáa cǎháⁿ-í”,

duha ní cáháⁿ-í cuèndá-yu.

11 Te xíǎⁿ nǎu ní cudèèⁿ-í núǎ-yu te ní xáhaⁿ ndǎá-í xíí-yu sá vǎ ndúú tǎhǎ-yu cundecu váha-yu núú ndécú-í.

Duha ní cachí Yǎ Ndiǒxí cǎchí Espíritú-gá.

12 Te nchòhó ñáyiu ndècu ndǎhi-í ichi Xítóhó Jesucristú, cǎháⁿ-í dóho-ndo sǎ ïo cada cuèndá-ndó vǎ cání cuèhé iní-ndó te ngóo-ndo vǎ quíndáá-gá iní-ndó Yǎ Ndiǒxí te dañá-ndo ìchi-gá, te ñiu-gá cúú-gǎ Yaá ndécú nchàa nduu nchaa quíú. 13 Te ñⁿ nduu ñⁿ nduu ío chí cuǎha tnàha tnúhu ndee iní cundecu-ndo ñini ndecu-ndo ñuyíú-a cuèndá sá vǎ

xĩnu iní-ndó càda-ndo nándi sá cuèhé sá dúhá, te ducaⁿ te vá cúú sàá iní-ndó nũú Yă Ndiõxí. ¹⁴ Te vá dáñá ndèé-ó càni ndáá iní-ó nàcuáa cada ñaha Yă Ndiõxí xii-o, te dàtná-ni ní sani iní-ó ndèé cútnàhá ní tuha-o ìchi Yá Ndiõxí, te ðiu-ni ducaⁿ càni iní-ó ndèé ná sàá nduu vǎ cùndècu-gá-ó ñùyíú-a, te núu ducaⁿ na càda-o te cùu ñⁿnuu-o ndihí Xítóhó Jesu-crìstú.

¹⁵ Te duha càháⁿ-xi ñⁿ xichi núú tùtú Yă Ndiõxí: Te núu nchòhó ndèdóho-ndo nàcuáa càháⁿ Yă Ndiõxí vitna, te vá cùndùu sàá iní-ndó dàtná ní xĩnduu sàá iní cue ñáyiu ní dáquéé tĩhú tnũhu-gá ndéé sanaha. Duha càchí-xi núú tùtú-gá. ¹⁶ Te cue ñáyiu ducaⁿ ñĩ xĩnduu sàá iní-xi cùú-yu ñáyiu ní ndeñuhu ndíi Moisés nàción Ègiptú, te ñáyiu-áⁿ ñĩ xĩndedóho-yu tnũhu ní cáháⁿ Yă Ndiõxí te ní quide sàá iní-yu ní dáquéé tĩhũ-yu tnũhu-gá. ¹⁷ Te ndi ùdico cuíá ñĩ xúhuⁿ-yu ichi ío ní cùdééⁿ Yă Ndiõxí núú-yu cuendá sá ñĩ quidé-yu nándi nchaa sá cuèhé sá dúhá, te ñáyiu-áⁿ ñĩ xihí-yu xití yucu. ¹⁸ Te nchaa ñáyiu-áⁿ ñà túú ní cuiní-yu tñí-yu tnũhu ní cáháⁿ Yă Ndiõxí nũu xíáⁿ ní cáháⁿ ndáá-gá sá vǎ ndúú tǎhũ-yu cundecú-yu núú ïo váha càa ndecu-gá. ¹⁹ Te xíáⁿ nũu nchoo cùtnuní iní-ó sǎ nchaa ñáyiu-áⁿ ñà túú ní ndùu tǎhũ-yu cundecu váha-yu núú ndécú-gǎ, chi ñǎ túú ní sàndáá iní-yu tnũhu ní cáháⁿ-gá.

4

¹ Te vitna ndècu ndihí-gá-ó tnũhu Yá Ndiõxí tnũhu sá dánèhé ñáhá xii-o sá cúú cùndecu váha-o nũú ndécú-gǎ, te tàú-xi quiyuhú iní-ó chi na cuáháⁿ te vá ndúú tǎhú-ó cùndecu váha-o nũú ndécú-gǎ.

² Te tnàhá nchoo ñĩ ngúndecu ndihí-o tnũhu sá

càháⁿ nàcuáa naníhí tǎhú-ó dàtná ní xíndecu ndíhi cue ñáyiú ndéé sanaha, dico ñáyiú-áⁿ chí ñá túú vǎdana ní nàndíhi-xi cuéi ní xíndedóho-yu tnúhu-áⁿ chí ñá túú ní sàndáá iní ñáhǎ-yu xii-gá. ³ Dico nchoo cùu-o ñáyiú ní sàndáá iní tnúhu Yá Ndiǒxí, núu xíáⁿ nduu tǎhú-ó cùndecu váha-o núú ndécú-gǎ, te ní quee ndáá-xi nàcuáa càháⁿ-gá núú tǔtú-gá núú càchí-xi:

Yúhú ní cudééⁿ-í núú-yu, te ní cáháⁿ ndáá-í sá vǎ ndúú tǎhǔ-yu cundecu váha-yu núú ndécù-í.

Duha ní cachí-gá. Te cuu nduu tǎhǔ-yu cundecu váha-yu núú ndécú Yǎ Ndiǒxí ní cùu, chí sa ní xínu cava nchaa chiuⁿ ní quide-gá sá ñí cadúha-gá ñuyíú. ⁴ Te núú tǔtú Yǎ Ndiǒxí càháⁿ-xi nàcuáa ní quide-gá nduu úsá, te duha càchí-xi:

Yá Ndiǒxí ní quide chiuⁿ-gá ínú nduu ní quide-gá nchaa chiuⁿ-gá te ní ndetatú-gá nduu úsá.

Duha càchí-xi núú tǔtú-gá. ⁵ Te càchí tucu-xi núú tǔtú Yǎ Ndiǒxí nàcuáa ní cáháⁿ-gá cuèndá cue ñáyiú ndéé sanaha, te duha ní cachí-gá:

Cue ñáyiú-a vá ndúú tǎhǔ-yu cundecu váha-yu núú ndécù-í ndétátú-í.

Duha ní cachí-gá. ⁶ Te ñáyiú ní xíndedóho tnúhu sá càháⁿ nàcuáa naníhí tǎhú-ó ndéé sanaha, ñá túú ní ndùu tǎhǔ-yu cundecu váha-yu núú ndécú Yǎ Ndiǒxí ndétátú-gá, te ducaⁿ chí ñá túú ní sàndáá iní ñáhǎ-yu xii-gá, dico íó-gá ñáyiú nduu tǎhú cundecu váha núú ndécú-gǎ ndétátú-gá. ⁷ Te ní xica cuéhé nduu sá dúcáⁿ ñà túú ní sàndáá iní ñáhá ñáyiú-áⁿ xii-gá, te dàtnùní ní cáháⁿ ndíi Dàvíí yuhu-gá nàcuáa cada-gá vitna, te diu-ni nàcuáa sa yòdo tnuní diu-ni ducaⁿ chido tnuní tucu-í nàcuáa ní cáháⁿ ndíi yuhu-gá, te duha ní cachí-gá:

Te núu nchòhó ndèdòho-ndo tnũhu càháⁿ-í te vá
cádá sàá iní-ndó.

Duha ní cachí-gá. ⁸ Te ndíi Jòsué ní sanu ichi
ndíi ñáyiu núu quíhíⁿ-yu cundecu váha-yu, dico
ñá díú cuendá xíáⁿ ní cãháⁿ Yã Ndiõxí, chi cuendá
nàcuáa cada-gá vitna ní cáháⁿ-gá. ⁹ Núu xíáⁿ sáá
nduu nduu táhú nchaa ñáyiu cùu cuendá Yã Ndiõxí
ngúndecu váha-yu núu ndécú-gã ndétátú-gá. ¹⁰ Te
nchaa ñáyiu ducaⁿ na nduu táhú cundecu váha
núu ndécú Yã Ndiõxí ndétátú-gá, te tnàhá-yu nde-
tatú-yu cuendá nchaa sá vãha ní quidé-yu dàtná
ndétátú méé-gã. ¹¹ Te xìni ñuhu-xi sá nchóó
ïo nducu ndèe-o nducu-o nacuáa cada-o cuendá
nduu táhú-ó ngúndecu váha-o núu ndécú Yã Ndiõxí
ndétátú-gá, chi na cuáháⁿ dava-ndo càda-ndo
datná ní quide cue ñáyiu ñá túú ní sàndáá iní ñáhá
xì-gá, te vá ndúú táhú-ndó cùndecu váha-ndo núu
ndécú-gã te núu ducaⁿ na càda-ndo.

¹² Te tnúhu Yá Ndiõxí cúú-xí dàtná ìⁿ sá nchító-ó
chi quide-xi nándi sá quidé-xí, te cùu-xi datná
ìⁿ sá dèéⁿ víhí-gã dàcúúxí ìⁿ yuchí sá ndèé úú
xio núú-xi. Te ducaⁿ sãtnahá-xi cùu tnúhu-gá chi
quée-xi iní-ó, te dàndixi túu-xi nchaandi túhú sá
sání ìní-ó te núu quide váha-o àdi ñá túú quide
váha-o ndècu-o. ¹³ Te ni ìⁿ sá ñi cadúha Yá Ndiõxí
vá cáni ìní-ó sã ndácú-xí nguivãha-xi núú-gã, chi
nchaandi túhú sá sání ìní-ó ndècu túu-xi núú-gã, te
diu núú Yàá-áⁿ na càni cuendá-ó nchaa sá quidé-ó.

Xítohó Jesucristú cúú-gã Dútú ïo cùnuu

¹⁴ Te Xítohó Jesucristú cúú-gã Dútú ïo cùnuu
ndecu ndihí-o, te diu-gá cúú-gã Déhe Dútú Ndiõxí,
te Yàá-áⁿ cuãndaa-gá andiu ñi nucúndecu-gá núú

Yă Ndiöxí, núu xíăⁿ tàú-xi sá cánchezíⁿ nihnu-ni-o quíndáá iní-ó-gă. ¹⁵ Te mee Yàá-áⁿ ïo cùnūu-gá cúú-gă dútú-ó ndècu ndihí-o, te ío na cùndahú iní ñáhá-gă xii-o cuèndá sá ñă nihí ndéé-ó cùndecu-o. Te ducaⁿ càda-gá chi ní yáha-gá dàtná yăha mee-o, chi nchaa sá ñă yáha-gá-áⁿ ñă cuu-xi sá cádá-gă nándi nchaa sá cuèhé sá dúhá ní cùu dīco ni ñⁿ ñá túú ní quide-gă. ¹⁶ Núu xíăⁿ tàú-ó sá nchóó nì yuhu ni iní-ó cǎháⁿ ndihí-o Yă Ndiöxí Yáá ío cùndahú iní ñáhá xii-o chindee ñaha-gá, te ducaⁿ càda-o te cundàhú iní ñáhá-gă chindee ñàha-gá xii-o ndèda-ni càa oré xíní ñùhu-o-gă.

5

¹ Te nchaa cue dútú cùnūu núu ñăyiu isràél dīu-ni ñăyiu cùu-güedé, te ducaⁿ ñă ngúndecu-güedé cuèndá cada-güedé chùⁿ sá cúú-xí Yă Ndiöxí cuèndá-yu, chi dīu cue téé-áⁿ ñă xóo nacani cuèndá-güedé núú-gă quiti ní xóo cahni-güedé ní xóo nduu táhú-gă, te ducaⁿ ñă xóo cada-güedé cuèndá sá cádá càhnu iní Yă Ndiöxí cuéchi-yu, te ducaⁿ ñă xóo nacani cuèndá tucu-güedé núú-gă nchaa dava-gá sá ñă xóo níhí-güedé ní xóo nduu táhú-gă. ² Te nchaa cue dútú-ăⁿ ñă xóo cundee ìní-güedé nchaa sá ñă xóo cada nchaa ñăyiu ñá túú ní quide ndáá ñăyiu ñá túú cùtnuní iní-xi, te ducaⁿ ñă xóo cada cue dútú-ăⁿ chi tnàhá-güedé ñá túú ní xóo níhí ndéé-güedé cundecu-güedé cuèndá nchaa sá ñă xóo yáha-güedé. ³ Te sá cuèndá sá dúcáⁿ ñá túú ní xóo níhí ndéé-güedé nūu xíăⁿ dai ní xini ñuhu-xi sá tnàhá-güedé cuáha-güedé Yă Ndiöxí sá ndúú táhú-gă cuèndá méé-güedé dàtná quídé-güedé cuèndá ñăyiu.

⁴ Te ni ñⁿ tée vá ndácú-dě cuu-dé dútú cúnùu cuendá-ni sá cächí iní mée-dě te núu ñá díú mée Yá Ndiöxí ducaⁿ cuiní-gá sá cúú-dě dútú cúnùu datná ní quide-gá ndíi Àrón. ⁵ Te cuëi Xítohó Jesucrístú chi ñá díú mée-gá ní quide-gá mée-gă ñⁿ dútú cúnùu nacuaá cada nínu-gá mée-gă, chi mee Tătá-gă Dútú Ndiöxí ducaⁿ ñí cachí-gá sá cúú-gă Dútú cúnùu, te ducaⁿ chi Yá Ndiöxí ní xáhaⁿ-gă:

Yòhó cúú-n Dêhe-í,

te cuiní-í sá dúhá-ní cùndecu-n núú ndécù-í.

Duha ní xáhaⁿ-gă xii Xítohó Jesucrístú. ⁶ Te núú tütú Yă Ndiöxí yódó tnùní nàcuáa ní xáhaⁿ tùcu-gă xii Xítohó Jesucrístú, te duha ní xáhaⁿ-gă:

Yòhó cúú-n dütú cundecu ni caa ni quíhíⁿ,

te cùu-n datná ní cuu ndíi Melquisedéc.

Duha ní xáhaⁿ-gă xii Xítohó Jesucrístú. ⁷ Te cúnàhá ní xíndecu Xítohó Jesucrístú ñuyíú-a te níhi ní xóo cáháⁿ ndíhi-gá Yă Ndiöxí te ní xóo cáháⁿ ndàhú-gá núú-gă, te ní xóo ndáhyú-gá òré ducaⁿ ñí xóo cáháⁿ ndíhi-gá Yă Ndiöxí, te ducaⁿ ñí quide-gá chi nàha-gá sá Yă Ndiöxí cúú-gă Yaá ndacu dàcácu nihnu ñaha xì-gá cuèndá sá vă cùú dúcáⁿ-gă. Te Yá Ndiöxí ní xíndedóho-gá nchaa tnúhu ní cáháⁿ Xítohó Jesucrístú cuèndá sá ñí quide-gá nchaa nàcuáa ní xáhaⁿ Yă Ndiöxí cada-gá. ⁸ Te sá cuèndá nchaa sá ñí ndoho Xítohó Jesucrístú xíăⁿ ní cutnùní iní-gá cada-gá nchaa dava-gá sá văha nàcuáa cuiní mée Yă Ndiöxí cada-gá. Te ducaⁿ ñí cuu cuëi cùu-gá Déhe Yá Ndiöxí. ⁹ Te sá dúcáⁿ ñí quide-gá nchaa nàcuáa cuiní mée Yă Ndiöxí, xíăⁿ núu vitna cùu-gá Yaá dácácu nihnu nchaa ñáyíu sàndáá iní ñáhá xì-gá núú ùhú núú ndàhú. ¹⁰ Te mee Yă Ndiöxí

ní cachí-gá sá Xítohó Jesucristú cúú-gă dútú cúnùu datná ní cunuu ndíi Melquisèdec cùtnàhá ní cuu ndíi dútú ñuyíú-a.

Cuèndá ñáyiú cuìní dañà ñìhnu ichi Yá Ndiõxí

¹¹ Te vài-gá tnúhu ndècu cáháⁿ-í nàcuáa ndùu cuendá Xítohó Jesucristú, ndihì ndíi Melquisèdec, te dìcò-ni sá nchòhó ío cuèé tècú tnùnì-ndó, te yúhú ío úhú ñìhí-í nàcuáa cáháⁿ-í nàcuáa tecú tnùnì-ndó.

¹² Te nchòhó sa ní cuu cuéhé nduu ndècu-ndo ichi Xítohó Jesucristú, te tàú-ndó dānehé-ndó cuè ñáyiú ndècu ichi-gá tnúhu-gá nūu dìcò sá cúú, dìco xìnì ñuhu-ni-xi sá cùndècu ñáyiú danèhé ñáhá tnūhu-gá xii-ndo, tnúhu sá ñí dācuáhá-ndó ndéé dīhna sá ñā túú úhú tecú tnùnì-ndó. Te sá dúcáⁿ quide-ndo núu xíáⁿ cúú-ndó dàtná cue landú vitna sàdi camá, landú vátá cúú-gă caxi dítá. ¹³ Chi nchaa ñáyiú cùu datná landú vitna sàdi, ñáyiú-áⁿ cúú nèñuú-yu ñā túú cùtnuní iní-yu nàcuáa càháⁿ tnúhu sá càháⁿ nàcuáa cada ndáá-yu cundecú-yu.

¹⁴ Te nchaa sá vátá cúú-gă caxi cue landú yíquíⁿ xíáⁿ cúú-xí cuèndá cue ñáyiú sacuéhé, te xíáⁿ cúú-xí dàtná tnúhu sá dācuàha ñáyiú sa ní ñìhí ndéé ndècu ichi-gá, ñáyiú sa ní cutnùnì váha iní-xi nāndi cùu nchaa sá cuéhé sá dúhá, ndihì nāndi cùu nchaa sá vāha.

6

¹ Te xíáⁿ nūu vitna xìnì ñuhu-xi dacuaha-o dava-gá tnúhu Yá Ndiõxí cuèndá ducaⁿ te cuu-o ñáyiú tècú tnùnì nchaa tnúhu-gá. Te xìnì ñuhu-xi sá ncháá tnūhu Xítohó Jesucristú sá ñí dācuáhá-ó ndéé dīhna vá dācuàha-gá-ó dàtná ní dācuáhá-ó chi sa tècú tnùnì-ó. Te ñā túú-gă xínì ñūhu-xi

dacuaha-o datná ní dáciuáhá-ó ndèè díhna nàcuáa cada-o ndìxi cuéchi iní-ó cuèndá nchaa sá cuèhé sá dúhá quìde-o, sá tá dàcuíta nihnu ñaha xì-o cuáháⁿ ní cùu. Te ducaⁿ vǎ dáciuàha-gá tucu-o dàtná ní dáciuáhá-ó ndèè díhna nàcuáa cada-o quìndáá iní-ó Yǎ Ndiöxí,² ndìhi cuèndá nàcuáa ní dáciuáhá-ó nàcuáa cuandute-o, ndìhi cuèndá nàcuáa cada-o càcáⁿ ndodo-o ndàha-o díquí ñǎyiu ní sándáá iní ñáhá xì-gá. Te ducaⁿ ñà túú-gǎ xíní ñùhu tucu-xi dacuaha-o datná ní dáciuáhá-ó ndèè díhna cuèndá nàcuáa ndoto cue ñáyiu ní xíhí, ndìhi cuèndá nàcuáa ní dáciuáhá-ó sǎ Yǎ Ndiöxí daquìhíⁿ-gá ñáyiu núú ùhú núú ndàhú ni caa ni quíhíⁿ.³ Te núu Yá Ndiöxí ná càchí-gá, te cuita dacuàha-gá-ó nchàa dava-gá tnúhu sá cúmǎní quíhíⁿ.

⁴ Te cue ñáyiu sa tècú tnùnì tnúhu Yá Ndiöxí, ñáyiu sa xíní nchaa nàcuáa ndùu nchaa sá vǎha quìde ñaha Yá Ndiöxí xii-o ndìhí-yu, ñáyiu sa chìndee ñaha Espíritú Yǎ Ndiöxí,⁵ ñáyiu sa cùtnuní iní-xi sá ïo váha tnúhu Yá Ndiöxí, ñáyiu sa xíní nàcuáa ta quìde Yá Ndiöxí véxi nchaa sá vǎ yǒo tnàhí ndàcu cada,⁶ te núu ñáyiu-áⁿ ná ngüíta tucú-yu daquèè tíhú duúⁿ-yu tnúhu Yá Ndiöxí, te vǎ ndácú-gǎ-ó nà canu ichi-ó-yu nàcuáa ndìxi cuéchi iní-yu te núu ducaⁿ na càdá-yu, te sá dúcáⁿ ná càdá-yu te tnàhá-yu cùú-yu dàtná cue téé ní sahani ñaha xì Xítóhó Jesucristú Déhe Yá Ndiöxí núú cùrúxí. Te sá dúcáⁿ ná càdá-yu te ngóo dava-gá ñáyiu cáháⁿ cuèhé-yu cuèndá Xítóhó Jesucristú.⁷ Te nchaa ñáyiu cùú-yu dàtná ñuhu, chi ñuhu-áⁿ ndi tnàhá òré cúúⁿ dǎú te xìhi-xi ndute, te dava ñuhu váha cùu sá xítú ñáyiu, te sá cúú núú ñuhu-áⁿ ïo

nàndíhi-xi, te mee Yă Ndiöxí quidé-gă cúú să văha núú ñúhú-ăⁿ. ⁸ Dico núú dà iñu na ndàa núú ñuhu-áⁿ te ñá túú vėdana nàndíhi-xi te núú ducaⁿ, te Yă Ndiöxí vá cúú văha iní-gá cuendá ñuhu-áⁿ sá dúcáⁿ dà iñu ndaa núú-xi, te iñu-áⁿ ndihi-xi cáyú. Te ducaⁿ sãtnahá-xi cùu ñáyiu dàquee tíhú tnũhu Yă Ndiöxí chi ñá túú cùu văha iní-gá núú-yu.

Níhí-ó sã ndétú-ó ndùu táhú-ó

⁹ Te cuèi duha càháⁿ-í dico nchòhó cue ñáyiu ío cùu iní-í, chi cùtnuní ndáá iní-í sá vă cádá-ndó dàtná xĩquide dava-gá ñáyiu, te mee-ni sã văha cuu xii-ndo chi cùu-ndo ñáyiu sa ní naníhí tàhú. ¹⁰ Te ducaⁿ chi Yă Ndiöxí cúú-gă Yaá ío văha quide ndáá, te vá dáná ndòdo iní-gá nchaa sá văha quide-ndo, te ni vă dáná ndòdo iní-gá nàcuáa quide-ndo cuu iní-ndó-gă, te sá dúcáⁿ quide-ndo cuu iní-ndó-gă xíáⁿ chíndèe-ndo cue ñáyiu ndècu ndihi-ndo ichi Xítóhó Jesucristú, te ducaⁿ-ni ta quide-ndo véxi ndéé vitna. ¹¹ Te cuiní-í sá ìⁿ ìⁿ-ndo nducu ndee-ndo cada-ndo nacuáa cuiní Yă Ndiöxí dàtná tá quide-ndo véxi, te ðiu-ni ducaⁿ càda-ndo ndéé ná sàá nduu ndùu táhú-ndó cùndecu-ndo ndihi-gá núú ndécú-gă, te ducaⁿ te níhí-ndó nchàandi túhú sá ndétú-ndó ndùu táhú-ndó cùndecu ndihi-ndo ni caa ni quíhíⁿ. ¹² Te yúhú cuiní-í sá nchòhó vá tühío-ndo càda-ndo nchaa nacuáa cuiní Yă Ndiöxí, te cada-ndo dàtná quidé ñáyiu sàndáá iní tnũhu-gá, ñáyiu càhnu iní-xi. Te sá dúcáⁿ quidé-yu xíáⁿ nihí-yu nchaa sá ñí cachí Yă Ndiöxí nduu táhú-yu.

¹³ Te cútnàhá ní xáhaⁿ Yă Ndiöxí xii ndíi Àbrahám nàcuáa cada-gá, te ní cacunehe-gá mée-gă nàcuáa cutnùní iní ndíi sá ndàá cada-gá nàcuáa ní xáhaⁿ-gă xii ndíi, te vá yõo ìⁿ ni càcunehe-gá cuendá sá

quìndáá iní ndíi tnúhu ní cáháⁿ-gá. Te ducaⁿ nĩ quide-gá chi ìⁿdìi díi-ni mee-gá ío cùnuu-gá.

14 Te duha ní xáhaⁿ-gã xii ndíi Àbrahám: “Yòhó té Àbrahám na càchí tnúhu ndáá-í xii-n sã ìo chindee ñàha-í xii-n, te cáyá cuéhé víhí ñàní tnáhá-n”, duha ní xáhaⁿ-gã xii ndíi. 15 Te ndíi Àbrahám ío ní quide ndee ìní ndíi ní xíndetu ndíi, te ducaⁿ te Yá Ndiòxí ní quide-gá nàcuáa ní xáhaⁿ-gã cada-gá sá cúú-xí ndíi. 16 Te núu ìⁿ ñáyiú càháⁿ ìⁿ tnúhu ndáá cuítì te càcu nehé-yu Yá Ndiòxí cuèndá quìndáá iní tnàha ñáyiú-yu tnúhu càháⁿ-yu, te òré ducaⁿ na càháⁿ-yu te ñá túú-gã sá dácàá ñáyiú càháⁿ ndihí-yu cuèndú. 17 Te ducaⁿ nĩ quide Yá Ndiòxí ní cáháⁿ ndáá-gá sá cádá-gã nàcuáa ní cachí-gá, te ducaⁿ nĩ cáháⁿ-gá cuèndá nchaa ñáyiú ní cachí-gá nduu táhú sã cádá-gã nàcuáa cutnùnì iní-yu sá quidé-gã ìⁿ sá càháⁿ-gá, te ni ñà túú nàdáma-gá ìⁿ sá càháⁿ-gá.

18 Te nchoo nĩ natuha-o Yá Ndiòxí cuèndá dàcácu nihnu ñaha-gã xii-o núú ùhú núú ndáhú, te ní níhí-ó tnúhu ndee ìní ndécú ndihí-o cuèndá sá vã dáñá ndéé-ó cùndetu-o sáá nduu ndùu táhú-ó cùndecu-o ndihí-gá. Te ducaⁿ nĩ níhí-ó tnúhu ndee ìní chi Yá Ndiòxí ní cáháⁿ ndáá-gá sá cádá-gã nàcuáa ní cachí-gá, te ñá túú dandahú ñáhá-gã, te ni ñà túú nàdáma-gá ìⁿ sá nĩ cachí-gá cada-gá.

19 Te tnúhu ndee ìní ndécú ndihí-o xíãⁿ quidé-xí cùtnunì ndáá iní-ó sã ndúú táhú-ó cùndecu-o ndihí Yá Ndiòxí núú ndécú-gã, te ducaⁿ cùtnunì ndáá ndisa iní-ó sã cuèndá Xítohó Jesucristú Yaá ndécú núú Yá Ndiòxí. 20 Te ducaⁿ nĩ nucúndecu Xítohó Jesucristú núú Yá Ndiòxí cuèndá ducaⁿ cànchicúⁿ nihnu-o càda-o, te ducaⁿ nĩ nucúndecu-gá núú Yá

Ndiöxí chi cùu-gá dútú cúnùu datná ní cunuu ndíi Melquisèdec ñuyíú-a, te ducaⁿ-ni cùu-gá dútú cúnùu ni caa ni quíhíⁿ.

7

Xítóhó Jesucrìstú cúú-gă dútú dàtná ní cuu ndíi Melquisèdec

¹ Te ndíi Melquisèdec ní xíndaha ndíi cue ñáyíu ñúú Sàlém, te ní cuu ndíi dútú ñí xinu cuechi ndíi núú Dütú Ndiöxí Yaá ío cunu. Te ndíi Melquisèdec-áⁿ ñí xícáⁿ táhú ndíi núú Yă Ndiöxí cuendá ndíi Àbrahám cútnàhá ní sáháⁿ ndíi Àbrahám-áⁿ ñí nàá ndíi ndíhi cue dava-gá cue téé yíndaha ñáyíu. Te cue téé-áⁿ ñà túú ní ndàcu-güedé nàá-güedé ndíhi ndíi Àbrahám-áⁿ chi ní xíta-güedé.

² Te nchaa sá ñí níhí ndíi Àbrahám-áⁿ nűú ñí nàá ndíi, te ní quide ndíi úxí xichi te ñíⁿ xichi núú ùxí-áⁿ ñí sáñaha ndíi xii ndíi Melquisèdec. Te diu ndíi Melquisèdec-áⁿ quée-xí: Téé ío váha quide ndáá yíndàha ñaha xii ñáyíu, duha quèe-xi. Te ní xóo danàni ñahá-yu xii ndíi Téé yíndaha ñúú Sàlém, duha ní xóo danàni ñahá-yu. Te tnúhu Sàlém-áⁿ quée-xí: Ñúú ndécú nàhi, duha quèe-xi tnúhu-áⁿ. Núú xíáⁿ quée tucu-xi nacuáa nàni ndíi Téé yíndaha ñúú ndécú nàhi, duha quèe tucu-xi diu ndíi. ³ Te ñà túú tnúhu núú yoo cùu tátá ndíi ndíhi náná ndíi, te ni ñà túú tnúhu núú yoo cùu xíi ndíi ndíhi xítná ndíi, te ni ñà túú tnúhu núú nándi cùu ñáyíu ní cuu ñanani tnáhá ndíi ní xíndecu ndéé sanaha-gă, te ni ñà túú tnúhu núú ná ama ní cacu ndíi, te ni ñà túú tnúhu núú ná ama ní xíhí ndíi. Te ndíi-áⁿ ducaⁿ-ni

nĩ cuu ndĩi dútú nĩ xíndecu ndĩi, te ducaⁿ sãtnahá-xi cùu Xítohó Jesucristú déhe Yá Ndiõxí chi cuu-gá dútú ni caa ni quíhíⁿ.

4 Te vitna chí cuãha váha cuendá sá ndĩi Melquisèdec ní cuu ndĩi ìⁿ tée ío ní cuu càhnu ní xíndecu ñuyú-a, chi ndĩi Àbrahám tée ní cuu ñaní tnáhá-ó nĩ xíndecu ndéé sanaha nĩ quide ndĩi úxí xichi nchaa sá nĩ níhí ndĩi núú nĩ naà ndĩi. Te ìⁿ xichi núú ùxí-áⁿ nĩ sãñaha ndĩi xii ndĩi Melquisèdec. 5 Te ndĩi Moisés ní chídó tnùnĩ ndĩi nàcuáa cada nchaa dútú, cue tée ní cuu ñaní tnáhá ndĩi Lèví sá cuè tée-áⁿ queheⁿ-güedé ìⁿ xichi núú ùxí xichi sá nihí cue ñáyiu israél ñáyiu cùu ñaní tnáhá-güedé cuu cuendá-güedé. Te ducaⁿ quide-güedé cuèi ñaní tnáhá-güedé ndihí-yu ní cuu ndĩi Àbrahám. 6 Te cuèi ñá díú ñàní tnáhá ndĩi Melquisèdec cúú ndĩi Àbrahám dico ní queheⁿ ndĩi Melquisèdec-áⁿ ìⁿ xichi núú ùxí xichi nchaa sá nĩ níhí ndĩi Àbrahám. Te ndĩi Melquisèdec-áⁿ nĩ xicáⁿ táhú ndĩi núú Yã Ndiõxí cuendá ndĩi Àbrahám. Te ḍi-u-ni ndĩi Àbrahám-áⁿ nĩ xáhaⁿ Yã Ndiõxí xii ndĩi sá cáda váha ñaha-gã xii ndĩi. 7 Te sa cùtnuní iní-ó sã nũu ìⁿ tée na càcáⁿ táhú-dě núú Yã Ndiõxí cuendá ìⁿ ñáyiu, te tée-áⁿ cúnũu-gá-dé. 8 Te cue dútú ñáyiu israél quéhéⁿ-güedé ìⁿ xichi núú ùxí xichi nchaa sá nihí-yu cùu cuendá-güedé, te cue tée-áⁿ cuú-güedé. Te núú tütú Yã Ndiõxí càchí-xi sá ndĩi Melquisèdec ndécú-ní ndĩi, te ducaⁿ càháⁿ-xi chi ñá túú tnũhu sá nĩ xihí ndĩi. 9-10 Te sá dúcáⁿ nĩ sãñaha ndĩi Àbrahám sá nĩ nduu táhú ndĩi Melquisèdec, te xíãⁿ cada iní-ó sã sã ndecu ndihí ndĩi Àbrahám cue ñaní tnáhá ndĩi Lèví cue tée cùu dútú, cue tée queheⁿ ìⁿ xichi núú ùxí xichi nchaa sá nihí ñáyiu israél cuèi

vátá cǎcú-gǎ-güedé. Te cada iní-ó sǎ tnáhá-güedé ní sáha-güedé ndíi Melquisèdec ìⁿ xichi núú ùxí xichi nchaa sá nǐ níhí ndíi Àbrahám núú nǐ nàá ndíi. Te ducaⁿ càda iní-ó chi cue téé-áⁿ cúú-güedé ñaní tnáhá ndíi Àbrahám cuèi vátá cǎcú-gǎ-güedé dàvǎ-áⁿ.

11 Te sá cuèndá cue dútú cue téé cùu ñaní tnáhá ndíi Lèví ní ngúndecu ndíi cue ñáyiú isràél tnúhu sá sánú ìchi ñaha xií-yu nàcuáa cadá-yu cundecú-yu. Te ñaní tnáhá ndíi Àrón cúú cuè dútú-ǎⁿ. Te núu dicó cue dútú-ǎⁿ ní ndàcu-güedé cada-güedé nàcuáa cudíu ñáyiú isràél núú Yǎ Ndiõxí, te ñá túú-gǎ xíní ñùhu-xi ngúndecu ìngá dútú dàtná ndíi Melquisèdec ní cùu. Te dútú-ǎⁿ ñà túú ní cùu-dé dàtná ní cuu cue ñaní tnáhá ndíi Àrón, 12 Te núú cuè dútú cue téé cùu ñaní tnáhá ndíi Lèví-áⁿ ní ngúndecu ìngá dútú. Te sá dúcáⁿ nǐ ngúndecu ìngá dútú xǎⁿ dacuítí nǐ xini ñùhu-xi sá dǎma nàcuáa ndùu tnúhu sá sánú ìchi ñaha xií-yu nàcuáa cadá-yu cundecú-yu. 13-14 Te diu-ni cuèndá dútú-ǎⁿ sa nihí-ó tnúhu, te dútú-ǎⁿ cúú Xítohó Jesucrìstú, te ñá díú ñaní tnáhá ndíi Àrón cúú-gǎ chi ñaní tnáhá ndíi Jùdá cúú-gǎ. Te nchaa-o tà xíní ndáá-ó sǎ ñaní tnáhá ndíi Jùdá cúú-gǎ, te ndíi Moisés ñá túú tnáhí ná ní càchí ndíi cuèndá cue ñaní tnáhá ndíi Jùdá sá cúú-güedé dútú, chi ní ìⁿ-güedé ñá túú ní cùu-güedé dútú ní cùu.

15 Te vitna cùtnuní ndáá iní-ó nàcuáa ní cuu, chi Xítohó Jesucrìstú cúú-gǎ ìngá dútú dàtná ní cuu ndíi Melquisèdec. 16 Te ñá díú cuèndá tnúhu sá sánú ìchi ñaha xii ñáyiú nàcuáa cadá-yu cundecú-yu ducaⁿ ni cùu-gá dútú, chi ní cuu-gá dútú cuèndá sá

cúú-gǎ Yaá cundecu ni caa ni quíhíⁿ chi vá ííⁿ ndùu te ndìhi nihnu-gá. ¹⁷ Te duha ní xáhaⁿ Yǎ Ndiǒxí xii-gá:

Yòhó cúú-n dütú dàtná ní cuu ndíi Melquisèdec, te cundecu-n nchaa nduu nchaa quíú.

Duha ní xáhaⁿ Yǎ Ndiǒxí xii-gá. ¹⁸ Te xǎⁿ nǔu nchaa tnúhu ndéé díhna, tnúhu sá nǐ xíndecu ndìhi cue dütú ñà túú-gǎ cúnùu-xi vitna chi ñá túú-gǎ xíní ñùhu-xi te ni ñà túú nǎ chíndèe ñaha-xi. ¹⁹ Te ñu-ni tnúhu-áⁿ cúú-xí tnùhu sá nǐ chídó tnùní ndíi Moisés canu ichi ñaha xii ñáyiú nàcuáa cadá-yu cundecú-yu. Te tnúhu-áⁿ ñà túú vèdana ni quíde-xi nacuáa chindee-xi ñáyiú cuđiú-yu núú Yǎ Ndiǒxí. Dico vitna ní ngúndecu ndìhi-o tnùhu ndee ìní sá ïo-gǎ váha dàcúúxí tnùhu ndéé díhna, chi ndècu ndìhi-o Xítóhó Jesucrìstú Yaá cúú dütú-ó. Te Yaá-áⁿ quíde-gǎ tnàhá tnúhu-o ndìhi Yá Ndiǒxí vitna.

²⁰ Te Yá Ndiǒxí ní cáháⁿ ndáá cuíti-gǎ sá Xítóhó Jesucrìstú cuu-gǎ dütú. ²¹ Dico ñá túú dùcaⁿ ní cáháⁿ-gǎ cuèndá cue ñaní tnàhá ndíi Lèví cue téé ní cuu dütú, cuèi mei òré ní chisaha-güedé ní cuu-güedé dütú. Te cútnàhá ní chisaha Xítóhó Jesucrìstú cúú-gǎ dütú, te Yá Ndiǒxí ní xáhaⁿ ndáá cuíti-gǎ xii-gǎ, te duha ní xáhaⁿ-gǎ:

Yúhú Dütú Ndiǒxí càháⁿ ndáá cuíti-í te vá dàmà-í tnúhu càháⁿ-í:

“Yòhó cúú-n dütú dàtná ndíi Melquisèdec, te cundecu-n nì caa ni quíhíⁿ.”

Duha ní xáhaⁿ Yǎ Ndiǒxí xii Xítóhó Jesucrìstú. ²² Te Xítóhó Jesucrìstú quíde-gǎ nàcuáa cutnùní ndáá ìní-ó sǎ Yǎ Ndiǒxí cada-gǎ ìngá núú sǎ vǎha sá cúú-xí-ó dàtná ní cachí-gǎ, te xǎⁿ cúú-xí sǎ ïo-gǎ váha dàcúúxí tnùhu ní cáháⁿ-gǎ ndéé díhna. ²³ Te

ío cuéhé cue ñaní tnáhá ndïi Lèví ní cuu-güedé dútú, te ducaⁿ cuendá sá ñà túú ní cùdí-güedé cundecu-güedé chi ní ndihí-güedé ní xíhí. ²⁴ Dico Xítohó Jesucristú chi vá cùú-gá, chi cundecu-gá ni caa ni quíhíⁿ nùu xíáⁿ ñíu-ni-gá cuu-gá dútú, te vá yóo ñíⁿ-gá cuu dútú cada núú-gá. ²⁵ Te núu xíáⁿ Xítohó Jesucristú dácácu nihnu ñaha-gá xii nchoo ñáyiú núú ùhú núú ndàhú, nchoo ñáyiú sàndáá iní ñáhá xì-gá, te ñíu-ni nchoo cùu-o ñáyiú tnàhá tnúhu ndihí Yá Ndiöxí, te vá ñíⁿ ndùu-gá te cuíta nihnu-o. Te ducaⁿ chi Xítohó Jesucristú ñá túú xòcuíñí-gá núú Yá Ndiöxí càháⁿ ndàhú-gá cuendá-ó.

²⁶ Te Xítohó Jesucristú cúú-gá Yaá cúú dütú cúnùu xini ñuhu-o cundecu ndihí-o, te ñíu-gá cúú-gá Yaá chíndèe chítúu ñaha xii-o, te cùu-gá Yaá ío quíde ndáá núú Yá Ndiöxí, te cùu-gá Yaá cándòo canine chi ñá túú tnàhí cuéchi-gá. Te ñá túú tnàhí quíde-gá dàtná quíde nchàa cue ñáyiú ndècu ichi cuehé ichi duha, te cùu-gá Yaá ní nucúndecu andíu núú ndécú Yá Ndiöxí te yàcáⁿ táxí tnùní-gá. ²⁷ Te ñá túú quíde-gá dàtná ní quíde cue dútú ní cunuu ñí xíndecu, chi cue dútú-áⁿ ñíⁿ nduu ñíⁿ nduu ní xóo cahni-güedé quítí ní xóo nduu táhú Yá Ndiöxí, te díhna-gá cuendá nchaa cuéchi mee-güedé ducaⁿ ñí xóo cada-güedé te dàtnùní ducaⁿ ñí xóo cada tucu-güedé cuendá nchaa cuéchi ñáyiú. Dico Xítohó Jesucristú chi ñíⁿ xito-ni ní xíhí-gá sá cúú-xí nchàa ñáyiú chi ducaⁿ ñí sani iní-gá, te vá ñíⁿ ndùu-gá ducaⁿ càda tucu-gá. ²⁸ Te sá cuendá nchaa tnúhu ní chídó tnùní ndíi Moisés xíáⁿ ní xíndecu cue téé ní cuu dútú cúnùu, te cue téé-áⁿ ñí cuu-güedé cue téé yíca cuéchi-xi. Te sátá dúcáⁿ ñí chídó tnùní

ndíi Moisés nàcuáa cada ñáyi, te ní xica cuéhé víhí ndùu te dǎtnùní ní cáháⁿ ndáá cuiti Yá Ndiöxí sá Dêhe-gá cuu-gá dútú cúnùu. Te Yaá cúu Dêhe-gá-áⁿ ñí quide-gá nchaa nàcuáa tàú-xi cunduu, te ñi-ni ducaⁿ càda-gá ni caa ni quíhíⁿ.

8

Xítóhó Jesucristú cúu-gǎ dútú cúnùu

¹ Te Xítóhó Jesucristú Yaá cúu dútú cúnùu ndecu ndíi-o cuánda-gá andi, te ní ngóo-gá xio cùha Dútú Ndiöxí Yaá ío cúnuu, te tnàhá-gá cúnùu-gá. Te ñi cuendá-a cùu-xi sá ño-gá cúnùu ta cáháⁿ-ndí véxi. ² Te núu ndécú Yá Ndiöxí cúu-xí núu ñí víhí. Te cada iní-ó sǎ cúu-xí ñíⁿ vehe te xíáⁿ ndécú Xítóhó Jesucristú cúu-gǎ dútú, te vehe-áⁿ ñí dácáa mèe Yá Ndiöxí te ñá díú cuè tée ñuyíu-a. ³ Te sá cuendá nchaa tnúhu ní chídó tnùní ndíi Moisés xíáⁿ ní xíndecu cue dútú cúnùu cuendá sá cáhni-güedé quiti nduu táhú Yá Ndiöxí, te nacani cuendá-güedé núu-gǎ nchaa dava-gá sá ñihí-güedé nduu táhú-gǎ. Te xíáⁿ núu dai ní xini ñuhu-xi sá tnàhá Xítóhó Jesucristú cuáñaha-gǎ ñíⁿ sá ndúú táhú Yá Ndiöxí, te táhú-ǎⁿ cúu-xí mèe-gá chi ní xíhí-gá ní cuu-gá dǎtná ñíⁿ táhú sǎ cúu-xí Yá Ndiöxí. ⁴ Te núu ñí xíndecu-ni Xítóhó Jesucristú ñuyíu-a te vá cúu-gǎ dútú ní cùu, chi sa ndècu cue dútú sǎñaha nchaa sá ndúú táhú Yá Ndiöxí dǎtná cáháⁿ nchaa tnúhu ní chídó tnùní ndíi Moisés. ⁵ Te nchaa sá quidé cuè dútú ñáyi israél nùtnahá-xi luha nchaa sá quidé Xítóhó Jesucristú Yaá cúu dútú cúnùu ndecu andi. Te quèe ndáá-xi nàcuáa ní xáhaⁿ Yá Ndiöxí xii ndíi Moisés cùtnàhá tá cùyatni ngüíta ndíi dacàa ndíi vehe-gá, te duha ní xáhaⁿ-gǎ: “Ío váha cada

cuendá-n nàcuáa daçàa-n vehe-í dàtná cáá sã ñí dánèhé ñáhà-í xii-n xití yucu”, duha ní xáhaⁿ-gã xii ndíi. ⁶ Dico vitna chi Xítóhó Jesucristú cúú-gã dútú cúnùu, te ío-gá càhnu nduu chiuⁿ quide-gá dàcúúxí cuè dútú cue ñáyiú isràél. Te ñiu Xítóhó Jesucristú cúú-gã Yaá quidé tnàhá tnúhu-o ndíi Yá Ndiöxí, te ducaⁿ chi Yá Ndiöxí ío-gá váha ndùu tnúhu ní cáháⁿ-gá xito cùu uú dàcúúxí tnúhu ní cáháⁿ-gá ndéé díhna, te ducaⁿ ño váha ndùu tnúhu ní cáháⁿ-gá xito cùu uú chi ní cachí-gá sá ìngá núú sã ño-gá váha cada ñaha-gã xii-o vitna.

⁷ Te núu nàcuáa ní cachí Yá Ndiöxí cada ñaha-gã xii-o ndéé díhna ní quide-xi nchaa nacuáa tàú-xi cunduú nàcuáa nduu táhú-ó cùndecu váha-o nñú-gã ñá, te ñá túú xini ñuhu-xi cáháⁿ tucu-gá sá cádá-gã ìngá núú sã váha sá cúú-xí-ó vitna ní cuu. ⁸ Te Yá Ndiöxí ñá túú ní cùu váha iní-gá núú ñáyiú isràél nñu xíãⁿ ní cáháⁿ-gá cuendá-yu, te duha ní cachí-gá:

Yúhú cúú-í Dútú Ndiöxí, te duha ndùu tnúhu na cáháⁿ-í: Sáá nduu te cada-í ìngá núú sã váha sá cúú-xí cuè ñaní tnáhá ñáyiú isràél, ndíi cue ñaní tnáhá ndíi Jùdá ñiu-ni ñáyiú isràél.

⁹ Te tnúhu sá cáháⁿ-í-a ñá túú ñiⁿ-ni cuu-xi ndíi tnúhu sá ní xáhaⁿ-í xii cue ñáyiú ní cuu ñaní tnáhá-yu ní xíndecu ndéé sanaha càda-í-yu, te ñiu-ni dàvá-áⁿ ñí quide yica-í ní ndeñuhu-í-yu nàcióⁿ Ègiptú, te ñá túú ní cuíni-yu tníi-yu tnúhu ní xáhaⁿ-í xii-yu cuendá ducaⁿ càda váha-í-yu, te xíãⁿ nñu ní dáñá ñihnu-í-yu ñá túú-gã ní quide cuendá-í-yu.

¹⁰ Te na sàá nduu te duha ndùu tucu ìngá núú sǎ vǎha cada-í cue ñáyiú isràél.

Te yúhú cada-í nàcuáa cutnùní váha iní-yu nàcuáa cuìní-í cadá-yu,

te ducaⁿ ñì yuhu ñì iní-yu cadá-yu.

Te yúhú Yǎ Ndiǒxí quindaha-ǎ-yu, te mèé-yu cuú-yu ñáyiú cùu cuendá-í.

¹¹ Te dàvá-áⁿ chi ñì ñáyiú cùu ndì meé-yu,

te ñì cuè dava-gá ñáyiú vá cùtnùhu tñàhá-yu sá nátùha ñàhá-yu xii-í,

chi dàvá-áⁿ nchaa ñáyiú cundecu ndìhi ñàhá-yu xii-í,

cuèi ñáyiú cùnnuu te cuèi ñáyiú ñá túú cùnnuu.

¹² Te dàvá-áⁿ cada càhnu iní-í nchaa sá cuèhé sá dúhá quidé-yu,

te vá ìíⁿ ndùu-gá ndacu iní-í nchaa sá quidě-yu.

Duha ní cachí Yǎ Ndiǒxí cuendá ñáyiú isràél. ¹³ Te sá dúcáⁿ ñì cáháⁿ Yǎ Ndiǒxí sá cadá-gǎ ìngá núú sǎ vǎha sá cúú-xí ñáyiú xiǎⁿ cùtnùní sá tñùhu sá ñì cáháⁿ-gá díhna ñá túú-gǎ xíní ñùhu-xi. Te cada iní-ó sǎ tñùhu-áⁿ cúú-xí ìíⁿ sá ñì cunaha ndècu te ñá túú-gǎ nándìhi-xi te cuíta-ná-xi, ducaⁿ sǎtnahá-xi cùu tñùhu sá ñì cáháⁿ-gá ndéé díhna.

9

Cuendá vehe Yá Ndiǒxí

¹ Te tñùhu sá ñì cáháⁿ Yǎ Ndiǒxí ndéé díhna cùu-xi cuendá nàcuáa cada ñáyiú isràél chiñuhu ñàhá-yu xii-gá, ndìhi cuendá vehe-gá caa ñuyúú-a. ² Te ñáyiú isràél ní dácáá-yu vehe Yá Ndiǒxí, te vehe-áⁿ ñì cuu-xi vehe dóó te ní xúhuⁿ nehu xítí-xi. Te cuàrtú díhna ní xínani-xi cuàrtú ní cuu íí, te xiǎⁿ ñì xíndecu

ìⁿ sá ndèé dité-xi sá ñí cándodó ìⁿ caa candíl núú dité-xi, te ní xínutní ìⁿ mèsá ní xóo códó pàá ní xóo nduu táhú Yă Ndiöxí. ³ Te cuàrtú cúú úú ní xínani-xi cuàrtú ní cuu íí víhí-gă. ⁴ Te xití cuàrtú-áⁿ ñí xínutní ìⁿ sá ñí cuáha mee-ni dǐhúⁿ cuàáⁿ te núú xǎⁿ ní xóo cahmi-güedé dúsa sá sàháⁿ tnámí. Te diu-ni xíaⁿ ñí xíndecu tucu ìⁿ càjá ní cuu mee-ni dǐhúⁿ cuàáⁿ te xití càjá-áⁿ ñí xúhuⁿ ìⁿ lítu ní cuáha mee-ni dǐhúⁿ cuàáⁿ, te xití lítu-áⁿ ñí xúhuⁿ mànáá sá ñí xóo caxí-yu dàvá-áⁿ. Te diu-ni xití càjá-áⁿ ñí xúhuⁿ tnudii ndii Àrón sá ñí saa itá-xi, ndihi yúú sǎ ñí xíndeé tnúhu ní cáháⁿ Yă Ndiöxí nàcuáa cada ñáyiu. Te duha ní xínani càjá-áⁿ: Càjá sá ñúhú tnúhu ní cáháⁿ Yă Ndiöxí sá cúú-xí ñáyiu, duha ní xínani-xi. ⁵ Te núú càjá-áⁿ ñí cándodó úú tnàhá sá ñí cadúha-yu, te xíaⁿ cáá-xí dàtná cáá espíritú xínú cuèchi núú Yă Ndiöxí. Te cuendá úú xíaⁿ ní cutnùní iní-yu sá ïo càhnu cuu Yă Ndiöxí, te sá ñí cadúha-yu-áⁿ ndèé ndíxíⁿ-xi, te ndíxíⁿ-xi-áⁿ dǎhu-xi xio xio núú quidé càhnu iní Yă Ndiöxí nchaa yíca cuèchi ñáyiu, dico vá cúú-gă cáháⁿ-í cuendá nchaa dava-gá xíaⁿ vitna.

⁶ Te nchaa xíaⁿ ní xíndecu xití vehe Yă Ndiöxí, te cue dútú ñí xóo quíhu-güedé ìⁿ nduu ìⁿ nduu xití cuàrtú díhna ní xóo cada-güedé nàcuáa tàú-güedé cada-güedé sá cúú-xí Yă Ndiöxí. ⁷ Te cuàrtú cúú úú-áⁿ chi mee-ni dútú cúnùu ní xóo quíhu-dé ìⁿ xito-ni ndi tnahá cuía. Te ndi tnahá òré ducaⁿ ñí xóo quíhu dútú cúnùu-áⁿ te ní xóo canehe-dé níñí ñí xóo quíhu ní xóo nduu táhú Yă Ndiöxí. Te ducaⁿ ñí xóo cada dútú-áⁿ cuendá sá Yă Ndiöxí cada càhnu iní-gă nchaa yíca cuèchi mee-dě, ndihi

nchaa yíca cuěchi ñáyi. ⁸ Te sá dúcáⁿ mée-ni dútú cúnùu ní xóo quíhu-dé xítí cuàrtú ní cuu í-gă-áⁿ, xiăⁿ Espíritú Yă Ndiöxí quídé-xí cùtnuní iní-ó să ñini ducaⁿ ní xíndecu vehe-áⁿ ñí xóo cadá-yu nàcuáa ní xóo cúñaha Yă Ndiöxí cadá-yu. Te xiăⁿ cùtnuní sá vătă sàá-gá nduu căháⁿ ndihí-yu Yá Ndiöxí nàcuáa tàú-xi cunduu. ⁹ Te sá dúcáⁿ ñí xíndecu vehe-áⁿ, ndihí sá dúcáⁿ ñí xóo cada nchaa cue dútú-ăⁿ, xiăⁿ cùtnuní iní-ó nàcuáa quide Yá Ndiöxí vitna, chi nchaa quití ní xóo cahni cue dútú-ăⁿ ñí xóo nduu táhú Yă Ndiöxí, ndihí nchaa dava-gá sá ñí xóo nduu táhú-gă ñá túú ní quide-xi nacuáa nduu ndoo nduu nine iní cue ñáyi nàcuáa cutnùní iní-yu sá ñá túú-gă cuéchi-yu ndècu núú Yă Ndiöxí. ¹⁰ Te sá dúcáⁿ ñí xóo cada nchaa dútú-ăⁿ ñí níhí tnáhá-xí ndihí nchaa tnúhu sá dánèhé ñáhá xii ñáyi ná cúú să cáxi-yu ndihí ná cúú să cúú còhó-yu ndihí nàcuáa ndáhá-yu. Te tnúhu-áⁿ ñí cuu-xi mee-ni să ñí sanu ichi ñaha xí-yu nàcuáa cundecú-yu ñuyíú-a. Te tnúhu-áⁿ ñí nàndíhi-xi ndéé ní sáá nduu ñí nadama Yá Ndiöxí tnúhu-áⁿ cuèndá sá vă dúcáⁿ-gă cadá-yu cundecú-yu.

¹¹ Te Xítohó Jesucrístú ní quixi-gá ñuyíú-a, te ñu-gá cúú-gă Yaá cúú dútú cúnùu, te xiăⁿ ñuu quide-gá nchaa sá văha sá cúú-xí-ó. Te vitna ní nucúndecu-gá núú ïo vii ío váha cãa, te núú ndécú-gă-áⁿ ñá túú cùu-xi ñí vehe sá ñí dácáa cuè téé ñuyíú-a. ¹² Te cada iní-ó să Xítohó Jesucrístú cuánguihu-gá xítí cuàrtú núú ñí cuu íí víhí dàtná ní xóo cada dútú cúnùu ní xíndecu ndéé sanaha, chi ní nucúndecu-gá núú ndécú Yă Ndiöxí. Dico ñá túú ni quide-gá dàtná ní xóo cada dútú

cúnùu ní xíndecu ndéé sanaha, chi dútú-ǎⁿ òré ní xóo quíhu-dé xítí cuàrtú ní cuu íí-gǎ-áⁿ, te ní xóo canehe-dé níńí chivá ndihí níńí chěhlu ní xóo quíhu. Dico Xítohó Jesucrìstú chi níńí méé-gǎ ní sati ní xíhí-gá núú cùrúxí, te xǎⁿ duuⁿ duuⁿ cuáháⁿ-gá ní nucúndecu-gá núú ndécú Yǎ Ndiǒxí. Te sá dúcáⁿ nǐ quide-gá xǎⁿ ní naníhí tǎhú-ó. ¹³ Te nchaa ñáyiu ní xóo cada nàcuáa vá cúú-gǎ-yu ñáyiu ní cuu íí, ñáyiu-áⁿ nǐ xóo códó ñáhá cuè dútú níńí ndicutu, ndihí níńí chivá, ndihí yáá cùñú chěhlu quití sàhni-güedé cuendá nduu íí tucú-yu. ¹⁴ ¡Dico níńí Xítohó Jesucrìstú chi ío-gá nándihí-xi sá cúú-xí nchòo ñáyiu xíndecu vitna! Te cuendá níńí-gǎ-áⁿ, chi Espíritú Yǎ Ndiǒxí sá ndécú nchaa nduu nchaa quíú nǐ cuu #ⁿnuu-xi ndihí Xítohó Jesucrìstú sá cúú cùú-gá cuendá cuu-gá dàtná #ⁿ tǎhú sǎ cúú-xí Yǎ Ndiǒxí cuèi cùu-gá Yaá ñá túú tǎhí cuéchi-xi, te ní sati níńí-gǎ te ní xíhí-gá. Te cuendá xǎⁿ ní cutnùní iní-ó sǎ Yǎ Ndiǒxí ní quide càhnu iní-gá nchaa sá ñà túú vǎha ní quide-o, te ní nduu ndoo ní nduu nine iní-ó. Te ducaⁿ nǐ nduu ndoo ní nduu nine iní-ó cuendá sá ndácú-ó cùnu cuechi-o núú Yǎ Ndiǒxí Yaá ndécú nchaa nduu nchaa quíú.

¹⁵ Te Xítohó Jesucrìstú ní quide ndáá-gá núú Yǎ Ndiǒxí cuendá cue ñáyiu ndècu ñuyú-a. Te cuendá xǎⁿ Yǎ Ndiǒxí cada-gá ingá núú sǎ vǎha sá cúú-xí-yu dàtná ní cachí-gá, te ducaⁿ càda-gá sá cuendá nchaa ñáyiu ní cáháⁿ-gá cundecu ndihí-gá, chi ñáyiu-áⁿ nduu tǎhú-yu cundecu ndihí vǎha ñáhá-yu xii-gá nǐ caa nǐ quíhíⁿ chi ducaⁿ nǐ cachí-gá, te ducaⁿ chi Xítohó Jesucrìstú ní xíhí-gá

núú cùrúxí cuèndá sá Yă Ndiöxí cada càhnu iní-gá nchaa yíca cuěchi-yu, nchaa cuéchi sá nǐ quidé-yu cútnàhá ní cunuu tnúhu sá nǐ cáháⁿ-gá díhna. ¹⁶ Te nchoo xíní-ó sǎ nǔu ñⁿ tée na càdúha ñⁿ tutú nàcuáa cada ñáyiu dàcáhñu-yu nchaa sá ndécú ndìhi-dé, te tutú-áⁿ xíní ñùhu-xi ndéé ná yǎha nduu cùú-dé. ¹⁷ Te ñá túú tàú-xi cada ñáyiu nàcuáa càháⁿ-xi núú tütú-áⁿ nini ndècu tée ní cadúha, dico sátá ná yǎha cuú-dé te cadá-yu nàcuáa càháⁿ-xi. ¹⁸ Te cuěi tnúhu ní cáháⁿ Yă Ndiöxí ndéé díhna nàcuáa cada váha-gá ñáyiu, te ñu-ni ndìhi níñí nǐ cundáá-xi chi ní sahani-güedé quítí te ní satí níñí-güedi. ¹⁹ Te ndíi Moisés ní cáháⁿ ndodo ndíi núú nchaa ñáyiu nàcuáa ní cachí Yă Ndiöxí cadá-yu, te nàcuáa-ni ndùu tnúhu ní chídó tnùní ndíi núú tütú ndíi ní cáháⁿ ndíi, te ní dácá ndíi ndute níñí chěhlu ndìhi níñí chívá líhli, te ní queheⁿ ndíi ñⁿ dité yutnu nàni hisópó ndìhi luha idi ticuèhé, te ní chindóyo ndíi níñí-ǎⁿ. Te ní sódo ndíi núú tütú ndéé tnúhu Yă Ndiöxí sá nǐ chídó tnùní ndíi-áⁿ, te tnàhá cue ñáyiu xíndecu-áⁿ nǐ chúcú ndíi. ²⁰ Te ní xáhaⁿ ndíi Moisés xii-yu: “Cuèndá níñí-a ní cundáá sá Yă Ndiöxí cada ñaha-gǎ xii-ndo sǎ vǎha chi ducaⁿ ní cachí-gá cada-gá sá cúú-xí-ndó”, duha ní xáhaⁿ ndíi xii-yu. ²¹ Te ñu-ni ducaⁿ nǐ quide tucu ndíi ní chúcú ndíi níñí vehe-gá ndìhi nchaa sá nándìhi-güedé òré chíñùhu-güedé Yă Ndiöxí ndécú xìtí vehe-gá-áⁿ. ²² Te tnúhu ní chídó tnùní ndíi Moisés càchí-xi sá méé-ní níñí chucu-güedě nchaa sá cǎnehe chùuⁿ-güedé òré chíñùhu-güedé Yă Ndiöxí, te sacú-nǎ te ndìhi ndoo nchaa xiǎⁿ chucu-güedě níñí ni cùu. Te dacuítí nǐ xini ñuhu-xi sǎ cáti níñí

cuèndá ducaⁿ càda cahnu iní Yă Ndiöxí nchaa yí cá cuèchi ñáyiu.

Xítohó Jesucristú ní xíhí-gá núú cùrúxí cuèndá sá vă cùndècu-gá cuèchi-o núú Yă Ndiöxí

²³ Te sá cuèndá sá ñí xíhí Xítohó Jesucristú núú cùrúxí, xíáⁿ ñá túú-gă cuèchi-o ndècu núú Yă Ndiöxí. Te cuèndá nchaa sá ñí xíhí xítí vehe-gá sá ñí dácáá ñáyiu isràél xíáⁿ cùtnùní iní-ó nàcuáa quìde-xi núú ndécú-gă. Te dacuítí ñí xini ñuhu-xi să cáhni-güedě cue quítí ní cachí Yă Ndiöxí cuèndá nduu íí nchaa sá ñí xíhí xítí vehe-gá-áⁿ. Te cuèi ducaⁿ ñí sahani-güedé cue quítí-áⁿ dico ñá túú ní quìde-xi nacuáa ngúndecu váha-o núú Yă Ndiöxí. Dico Xítohó Jesucristú ní xíhí-gá, te sá ñí xíhí-gá xíáⁿ ní quide-gá nacuáa ngúndecu váha-o núú Yă Ndiöxí. ²⁴ Te Xítohó Jesucristú cuándaa-gá andíu núú ndécú Yă Ndiöxí càháⁿ ndàhú-gá cuèndá-ó, te Xítohó Jesucristú chi ñá díú ìⁿ vehe ní dácáá cuè téé ñuyíú-a cuánguihu-gá. Te vehe Yă Ndiöxí sá ñí dácáá cuè ñáyiu isràél ñuyíú-a ndéé sanaha, ndíhí nchaa nacuáa ní xóo cada-güedé xítí vehe-gá-áⁿ xíáⁿ cùtnùní iní-ó nàcuáa quìde-xi núú ndécú-gă. ²⁵ Te dútú cùnùu núú ñáyiu isràél ní xóo quíhu-dé núú cuíá núú cuíá xítí cuàrtú ní cuu íí víhí-gă-áⁿ, te ní xóo canehe-dé níñí ñí xóo quíhu xítí cuàrtú-áⁿ dico ñá díú ñíñí méé-dě. Dico Xítohó Jesucristú chi ñá túú dùcaⁿ ní quide-gá chi ìⁿ xito-ni ní sati níñí-gă te ní xíhí-gá. ²⁶ Chi núu ní xíhí-gá nuu núu te ndéé cùtnàhá ní ngáva ñuyíú ducaⁿ ngüíta-gá cada-gá ní cùu, te vitna ta ndíhí nduu

cuáháⁿ ní quixi-gá ñuyíú-a ní xíhí-gá #ⁿ xito-ni cuendá cuu-gá dàtná #ⁿ táhú sǎ cúú-xí Yǎ Ndiǒxí, te ducaⁿ ñí quide-gá cuendá sá vǎ cùndècu-gá cuéchi ñáyíu núú Yǎ Ndiǒxí. ²⁷ Te nchoo cuè ñáyíu ñuyíú-a chi #ⁿ xito-ni cuú-ó te dàtnùní ducaⁿ te cada ndáá Yǎ Ndiǒxí cuéchi-o. ²⁸ Te ducaⁿ sǎtnhá-xi cùu Xítohó Jesucristú chi #ⁿ xito-ni ní xíhí-gá cuendá sá vǎ cùndècu-gá cuéchi ñáyíu núú Yǎ Ndiǒxí, te ducaⁿ ñí cuu ní xíhí-gá chi mee-gǎ ducaⁿ ñí cachí-gá cunduu. Te quixi tucu Xítohó Jesucristú ñuyíú-a dico ñá díú-gǎ sá cádá-gǎ cuendá sá vǎ cùndècu-gá cuéchi ñáyíu núú Yǎ Ndiǒxí, chi quixi-gá nacuaca-gá nchaa ñáyíu ndètu ñaha xii-gá cuendá cundecú-yu ndihi-gá ñi caa ñi quíhíⁿ.

10

¹ Te nchaa tnúhu ní xáhaⁿ ndíi Moisés xii ñáyíu is-ràél cadá-yu, nchaa tnúhu-áⁿ ñí quide-xi ní cutnùní luha iní-yu nàcuáa cada Yá Ndiǒxí cada váha ñaha-gǎ xii-o vitna. Dico ñá díú mèi nacuáa ní xáhaⁿ ndíi Moisés xii ñáyíu quide Yá Ndiǒxí vitna chi dǎma quide-gá. Te nchaa tnúhu ní cáháⁿ ndíi Moisés ñá túú ní ndàcu-xi cada-xi nacuáa cundáa nchaa ñáyíu tùha ñaha xii Yá Ndiǒxí cuèi ní xóo cahni-güedé quiti ní xóo nduu táhú-gǎ núú cuiá núú cuiá. ² Te núu dicó sá ñí xóo cahni-güedé quiti ní xóo nduu táhú Yǎ Ndiǒxí ní quide-xi nacuáa nduu ndoo nduu nine iní cue ñáyíu, te vá cáhni-gǎ-güedé cue quiti-áⁿ nduu táhú-gǎ ní cùu, te ducaⁿ te cutnùní iní-yu sá ñà túú-gǎ cuéchi-yu ndècu núú Yǎ Ndiǒxí ní cùu. ³ Te sá dúcáⁿ ñí xóo cahni-güedé quiti ní xóo nduu táhú Yǎ Ndiǒxí núú cuiá núú cuiá, xíáⁿ ní xóo ndacu iní cue ñáyíu

nchaa sá cuèhé sá dúhá nǐ xóo cada-yu. ⁴ Te ducaⁿ chi níñí ndicutu-áⁿ ndihí níñí chivá-áⁿ ñà túú ní xóo ndacu-xi cada-xi nàcuáa vǎ cùndècu cuéchi-yu núú Yǎ Ndiǒxí.

⁵ Te xǎⁿ nǔu cútnàhá ní quexìo Xítóhó Jesucristú ñuyíú-a ní xáhaⁿ-gǎ xii Yá Ndiǒxí:

Yòhó Tǎtà-í, ñá túú ndùu vétú váha iní-n sǎ sǎhni-güedě quiti ndùu táhú-n,

te ni ñǎ túú ndùu vétú váha tucu iní-n cuendá nchaa dava-gǎ sá táxi-güedě ndúú táhú-n,

núu xǎⁿ ní quide túha-n yìqui cuñú-í cuendá yúhú cuú-í te nduu táhú ñáhá-n xii-í.

⁶ Te ni ñà túú ndùu vétú váha iní-n cuendá quiti sǎhmi-güedě ndúú táhú-n te ni ñǎ túú ndùu vétú váha iní-n cuendá nchaa dava-gǎ sá táxi-güedě ndúú táhú-n cuendá sá vǎ cùndècu-gǎ cuéchi ñáyiu núú-n.

⁷ Núu xǎⁿ yúhú ní cachí-í xii yòhó Tǎtà-í Dútú Ndiǒxí sá yǔhú véxi-í ñuyíú-a cada-í nchaa sá cuìní-n càda-í dàtná yódó tnùnì cuendá-í núú tütú-n.

Duha ní xáhaⁿ Xítóhó Jesucristú xii Tǎtà-gǎ Dútú Ndiǒxí. ⁸ Te Xítóhó Jesucristú díhna-gǎ ní xii-gǎ Yǎ Ndiǒxí Yaá cúú Tǎtà-gǎ: “Yòhó Tǎtà-í ñá túú ndùu vétú váha iní-n cuendá quiti sǎhni-güedě ndúú táhú-n, ndihí cuendá quiti sǎhmi-güedě ndúú táhú tucu-n cuendá sá vǎ cùndècu-gǎ cuéchi ñáyiu núú-n, ndihí cuendá nchaa dava-gǎ táhú sǎ táxi-güedě xii-n ñà túú ndùu vétú váha iní-n cuendá nchaa xǎⁿ”, duha ní xáhaⁿ Xítóhó Jesucristú xii Tǎtà-gǎ Dútú Ndiǒxí. Te ducaⁿ nǐ xáhaⁿ-gǎ cuéi núú tütú ndíi Moisés yódó tnùnì sá dúcáⁿ càda-güedě. ⁹ Te sátá dúcáⁿ te ní xáhaⁿ tucu-gǎ xii Tǎtà-gǎ Dútú

Ndiöxí: “Yòhó Tătà-í Dútú Ndiöxí, mee-ĩ véxi-í ñuyíú-a cuendá cada-í nchaa nàcuáa cuení-n”, duha ní xáhaⁿ-gã xii Tătá-gã. Te sá dúcáⁿ nì cáháⁿ Xítóhó Jesucristú xiáⁿ ní cutnùní sá ñà túú-gã xíní ñùhu-xi ducaⁿ cada-güedé cahni-güedé nchaa quiti-áⁿ, te ducaⁿ chi mee Xítóhó Jesucristú ní xíhí-gá ní cuu-gá dàtná ìⁿ táhú sã cúú-xí Yã Ndiöxí, te ducaⁿ ñi cuu chi ducaⁿ tnáhi ní cachí Yã Ndiöxí cunduu. ¹⁰ Te Xítóhó Jesucristú ní quide-gá nàcuáa ní cuení Yã Ndiöxí cada-gá, chi ní xíhí-gá núú cùrúxí chi ducaⁿ ñi cuení méé-gã cunduu, te ìⁿ xito-ni ní xíhí-gá sá cuendá nchaa ñáyiú, te cuendá xiáⁿ ñuu ndècu yiñuhu-o núú-gã vitna.

¹¹ Te cue dútú ñáyiú isràél chi ìⁿ nduu ìⁿ nduu ní xóo cahni-güedé quiti ní xóo nduu táhú-gã, te ñã túú ní dàma-güedé nàcuáa ní xóo cada-güedé. Te nchaa sá ñi xóo cada-güedé-áⁿ ñà túú ní quide-xi nacuáa vá cùndècu-gá cuéchi ñáyiú núú Yã Ndiöxí. ¹² Dico Xítóhó Jesucristú ní cachí-gá sá cúú cùú-gá, te ní xíhí-gá núú cùrúxí cuendá nchaa yíca cuéchi nchaa nchoo ñáyiú ndècu ñuyíú-a. Te sátá dúcáⁿ te dàtnùní ní ngóo-gá xio cùha Dútú Ndiöxí táxi tnùní-gá, te vá ìⁿ ndùu ìⁿ quíú-gã te cuú-gá. ¹³ Te ñi-ni xiáⁿ cundecu-gá cundetu-gá ndéé sáá nduu cànehe nchaa sá cúú ùhú iní ñáhá xì-gá sá yiñuhu núú-gã. ¹⁴ Te cuendá sá ñi xíhí Xítóhó Jesucristú ìⁿ xito-ni xiáⁿ ní cuu-gá dàtná ìⁿ táhú sã cúú-xí Yã Ndiöxí, xiáⁿ ní quide-xi sá ncháá ñáyiú cùu cuendá-gá ñà túú-gã ná cumánñ-yu núú-gã ñi caa ñi quíhíⁿ. ¹⁵ Te mee Espíritú Yã Ndiöxí càháⁿ ndáá-xi nàcuáa ní cáháⁿ-gá cuendá-ó, te duha ní cáháⁿ-gá:

16 Sáá nduu te cada-í nchaa ñáyiu nàcuáa na cãháⁿ-í-a,
 te cada-í nàcuáa cutnùní iní-yu tnúhu sá dánèhé-í-yu tnúhu sá cánùichi ñaha xií-yu nàcuáa cadá-yu cundecú-yu,
 te cada tucu-í sá tñíⁿ-yu nchaa tnúhu-áⁿ.
 Duha ní cachí-gá. 17 Te ní cachí tucu-gá:
 Te vá ííⁿ ndùu ííⁿ quíú-gã ndacu iní-í sá quidé sàá iní-yu tnúhu-í,
 te ni vã ííⁿ ndùu ííⁿ quíú-gã te ndacu iní-í nchaa sá cuèhé sá dúhá quidé-yu.
 Duha ní cãháⁿ Yã Ndiõxí cãchí Espíritú-gá. 18 Te sá dúcáⁿ quide cahnu iní Yã Ndiõxí nchaa cuéchi-o, núu xiãⁿ ñá túú-gã xíní ñùhu-xi cuú quiti nduu táhú-gã cuendá nchaa sá cuèhé sá dúhá quide-o.

Tàú-ó sã tnahá tnúhu-o ndìhi Yá Ndiõxí

19 Te cue dútú ní xóo cunuu núú ñáyiu isràèl cue téé-áⁿ ní xóo quíhu-güedé xití cuártú ní cuu íí víhí-gã. Dico nchoo cuè ñáyiu ndècu ichi Xítóhó Jesucristú vitna tàú-ó sã nì yuhu ni iní-ó tnahá tnúhu-o ndìhi Yá Ndiõxí. Te cuu tnahá tnúhu-o ndìhi-gá chi Xítóhó Jesucristú ní sati níñí-gã te ní xíhí-gá núú cùrúxí. 20 Te cada iní-ó sã dõó sã ní xíndedí nàcuáa ní xóo quíhu-güedé xití cuártú ní cuu íí víhí-gã-áⁿ ní xócuíñí, te ducaⁿ càda iní-ó chi Xítóhó Jesucristú ní xíhí-gá cuendá nchoo ñhí-ó nàcuáa cada-o ngündecu váha-o sã cúú-xí-gã. 21 Te ñiu-gá cúú-gã Yaá cúú dútú-ó, te ñiu-gá cúú-gã Dútú cúnùu ndecu-gá núú ndécú Yã Ndiõxí. 22 Núu xiãⁿ xíní ñùhu-xi sá ïo tnahá tnúhu-o ndìhi Yá Ndiõxí, te vá cání ííⁿ caní úú iní-ó, te ío váha

quindáá iní-ó-gă chi diu-gá ní ndada ndoo ní ndada nine-gá iní-ó cuendá nchoo cùtnuní iní-ó sã ñã túú-gă cuéchi-o ndècu núú-gă. Te ní sandute-o cuendá sá dúcáⁿ ní nduu ndoo ní nduu nine iní-ó. ²³ Te nchoo càháⁿ ndáá-ó sã ndécú ndìhi-o tnúhu ndee iní sá ndúú tãhú-ó cùndecu ndìhi-o Yá Ndiòxí, te xini ñuhu-xi sá vã dáñá ndèé-ó cànchicúⁿ nihnu-o tnúhu ndee iní-áⁿ chi Yá Ndiòxí cada-gã nàcuáa ní cachí-gá sá cúú-xí-ó. ²⁴ Te xini ñuhu-xi cuhuⁿ iní tnáhá-ó te chindee tnàha-o nacuáa ducaⁿ cùu iní tnáhá-gă-ó, te cada-o mée-ni sá vãha. ²⁵ Te nchoo vã dáñá ndèé-ó nàtacá-ó núú dácuaàha-o tnúhu Yá Ndiòxí, te vã cadá-ó dàtná xiquide davá-yu ñã túú-gă cuìní-yu quixí-yu núú dácuaàha-o tnúhu-gă. Chi xini ñuhu-xi sá cuãha tnàha-o tnúhu ndee iní canchicúⁿ nihnu-o ìchi-gá, te uuⁿ-gá ducaⁿ tàú-xi cada-o vitna ta cuyatni nduu quixi tucu Xítohó Jesucrìstú ñuyú-a.

²⁶ Te cue ñáyiu sa ní tecú tnùní nàcuáa càháⁿ tnúhu Yá Ndiòxí te núu na ngũta-yu ñucúuⁿ cadá-yu nándi sá cuèhé sá dúhá, te àúⁿ nã cuu ní xihí Xítohó Jesucrìstú cuendá-yu, te ni vã yõ ñⁿ-gá cuú cuendá sá vã cùndècu-gá cuéchi-yu núú Yá Ndiòxí. ²⁷ Te núu ducaⁿ na cadá-yu nándi sá cuèhé sá dúhá, te ío quiyùhú iní-yu nàcuáa cada ñaha Yá Ndiòxí xií-yu. Chi nchaa ñáyiu cùu úhú iní ñáhá xii-gá daquìhíⁿ ñáhá-gă xií-yu núú ñùhú núú càyú núú ïo ndohó-yu. ²⁸ Te nchaa ñáyiu ní xóo daquèe tíhú tnúhu ní cáháⁿ ndíi Moisés, te núu ndècu úú àdi úní ñáyiu càháⁿ ndáá sá dúcáⁿ ní dáquée tíhú-yu tnúhu ní cáháⁿ ndíi, te vã yõ nì xóo cundàhú iní ñáhá xii nchaa ñáyiu ducaⁿ ní xóo cada chi ní xóo cahni ñaha-güedé. ²⁹ Te núu

ducaⁿ ñĩ ndoho cue ñáyiu ducaⁿ ñĩ dáquéé tĩhú
 tnũhu ní cáháⁿ ndíi Moisés-áⁿ, te uuⁿ-gá ndoho cue
 ñáyiu dàquee tihú ñáhá xii Xítoho Jesucristú Yaá
 cúú Dẽhe Yá Ndiõxí ñiu-ni ñáyiu cächí sá ñà túú
 nàndíhi níñí-gã. Te níñí-gã-áⁿ ñĩ sati, te ní xihí-gá,
 te ducaⁿ ñĩ cuu cuendá cada Yá Ndiõxí ingá núú
 sã vãha sá cúú-xí nchòo ñáyiu ndècu ñuyíú-a dàtná
 ní cachí-gá cada-gá. Te ñiu-ni cuendá níñí-gã-áⁿ
 ñĩ nduu ndoo ní nduu nine iní cue ñáyiu-áⁿ ní
 cùu, te ñiu-ni ñáyiu-áⁿ càháⁿ úhú-yu Espíritú Yá
 Ndiõxí sá chĩndèe chítúu ñaha xii-o. ³⁰ Te nchoo sá
 naha-o sá Yá Ndiõxí cächí-gá ñⁿ xichi núú tütú-gá:
 “Yúhú cada-í te nacháhu ñáyiu nchaa sá quidẽ-yu,
 te duha càháⁿ-í chi nachinaa-í cuendá nchaa sá
 quidẽ-yu-áⁿ”, duha cächí-gá. Te sa ñaha tucu-o
 nacuáa càháⁿ-xi núú tütú-gá núú cächí-xi: “Yá
 Ndiõxí cada ndáá-gá cuendá nchaa sá quidẽ ñáyiu
 cùu cuendá-gá”, duha cächí-xi núú tütú-gá. ³¹ Te ío
 ndàhú ndoho cue ñáyiu na dàndoho ñaha Yá Ndiõxí,
 te ñiu-gá cúú-gã Yaá cúnùu nchaa nduu nchaa
 quíú!

³² Te chí dándàcu iní nàcuáa ní quide-ndo
 cũtnàhá vitna cuu saa ní tecú tnùn-ndó tnũhu
 Yá Ndiõxí, chí dàvã-áⁿ ñĩ quide càhnu iní-ndó cuẽi
 nándi sá ñĩ yáha-ndo cuendá-gá. ³³ Te dava-ndo
 ñĩ quide úhú ñáhá ñáyiu xii-ndo núú chítú núú
 tàcã, te nándi tnúhu cuèhé tnúhu duha ní xáhãⁿ-yu
 xii-ndo. Te dava-ndo ñĩ cuyi-ni-ndo ní xĩndecu
 ndíhi tnàha-ndo cuẽi nándi ní ndoho dava-gá-ndó.
³⁴ Te ní cundàhú iní-ndó cuè ñáyiu yìhi vecaá, te
 cuẽi ní quendeé ñáyiu sá ndécú ndíhi-ndo dico
 ñá túú ní ndíhú iní-ndó chi ní cudíi-ni iní-ndó.

Te ducaⁿ ñ quide-ndo chi sa ñaha-ndo sá ndúú táhú-ndó sã ño-gá váha, te xíãⁿ cundecu ndihí-ndo ñi caa ñi quíhíⁿ. ³⁵ Te xíãⁿ vá dáñá ndéé-ndó quíndáá iní-ndó ñacuáa ní cachí Yã Ndiõxí cada ñaha-gã xii-ndo, chi sáá nduu te ío váha cada ñaha-gã xii-ndo. ³⁶ Te nchòhó xíní ñùhu-xi ío cada ndee iní-ndó càda-ndo nchaa ñacuáa càháⁿ Yã Ndiõxí, te ducaⁿ te nduu táhú-ndó sã ñi cachí-gá nduu táhú-ndó cundecu ndihí-ndo ñi caa ñi quíhíⁿ.

³⁷ Te Yá Ndiõxí càchí-gá núú tùtú-gá:

Ta cùyatni vii-ñã nduu quixi Yaá quixi ñuyíú-a, te vá cùyàa-gá.

³⁸ Te nchaa ñáyiu cùndáá núu-í ñã túú dàña ndeé-yu sàndáá iní ñáhã-yu xii-í, te cuèndá xíãⁿ cundecu-ní-yu ichi-í, dico núu na dàñá-yu ichi-í te vá cúú vãha iní-í núũ-yu.

Duha càchí Yã Ndiõxí núú tùtú-gá.

³⁹ Dico nchoo chi ñã túú cùu-o ñáyiu ducaⁿ xíquide dàñá-ó ichi Yá Ndiõxí, chi cùu-o ñáyiu nchìcúⁿ nihnu-ñi sàndáá iní-ó-gã, te sá dúcáⁿ te nduu táhú-ó cundecu-o ndihí-gá ñi caa ñi quíhíⁿ, te ñã túú cùu-o ñáyiu dàña nihnu ichi-gá te xíta nihnú-yu.

11

Ñáyiu sàndáá iní ñáhá xii Yá Ndiõxí

¹ Te núu sàndáá ndisa iní-ó Yá Ndiõxí te ducaⁿ cùtnuní ndáá iní-ó sã ñihí-ó sã cuìní-ó núú-gá. Te núu sàndáá iní-ó-gã te ducaⁿ cùtnuní ndáá tucu iní-ó sã càháⁿ ndáá-gá cuèndá nchaa sá ñã túú xíní-ó. ² Te ducaⁿ ñ quide ñáyiu ní xíndecu ndéé

sanaha ío ní sándáá iní-yu Yá Ndiöxí te xíãⁿ nõu ío váha ní cuu iní ñáhá-gã xií-yu.

³ Te nõu nchoo sándáá ndisa iní-ó Yã Ndiöxí te cùtnuní ndáá iní-ó sã sã cuendá tnúhu ní cáháⁿ-gá ní cuáha andiu ndìhi ñuyíú-a. Te cùtnuní iní-ó sã ñà díú sã cuendá ìⁿ sá tũu ndèhe-o ío ñuyíú-a ní cuáha andiu ndìhi ñuyíú-a.

⁴ Te ndíi Àbél ío ní sándáá iní ndíi Yá Ndiöxí nõu xíãⁿ ío-gá ní cuu iní-gá sá ñí sãñaha ndíi ní nduu táhú-gã dàcúúxí sã ñí sãñaha ndíi Càn xii-gá ní nduu táhú-gã. Te ndíi Àbél-áⁿ ñí cutnùní iní ndíi sá ñí cudíu ndíi núú Yã Ndiöxí cuendá sá ñí queheⁿ cuendá-gá sá ñí sãñaha ndíi ní nduu táhú-gã. Te cuèi ñá túú-gã ndíi ndècu ñuyíú-a dico yòdo tnuní sá ñí sándáá iní ndíi Yá Ndiöxí cuendá ducaⁿ càda-o canchicúⁿ nihnu-o.

⁵ Te té Ènóc téé ní xíndecu ndéé sanaha ñà túú ní xíhí-dé chi ní nacuaca ñaha túu Yá Ndiöxí xii-dé cuendá sá ñí sándáá iní ñáhá-dé xii-gá. Te vá yòo ní nànihí ñáhá xii-dé chi mee-gã ní nacuaca ñaha-gã xii-dé. Te núú tütú Yã Ndiöxí càchí-xi sá cùtnàhá vátá nàcuàca ñaha-gá xii té Ènóc, te ní quide-dé mee-ni nàcuáa ní cuu váha iní ñáhá-gã xii-dé. ⁶ Te nchaa ñáyíu ñá túú sándáá iní ñáhá xii Yá Ndiöxí ñá ndácũ-yu cadá-yu nàcuáa cudíu-yu núú-gã, chi nchaa ñáyíu cuìní tuha ñaha xii-gá xíní ñùhu-xi sá quíndáá iní-yu sá ndécú-gã, te quíndáá iní-yu sá nõu na nànducu nihnu ñahá-yu xii-gá te cuáñaha-gã xií-yu sá ndúú tãhũ-yu.

⁷ Te Yá Ndiöxí ní dátũha-gá ndíi Nõé nchaa nàcuáa cada-gá. Te ní quide ndíi nchaa nàcuáa ní xáhaⁿ Yã Ndiöxí cada ndíi, te ní cadúha ndíi ìⁿ

bàrcú cuendá xítí bàrcú-áⁿ quëe ndíi ndíhi nchaa ñáyiú vehe ndíi cuendá cácu nihnú-yu. Te ducaⁿ ñí quide ndíi chi ní sándáá iní ndíi Yá Ndiöxí. Te sá dúcáⁿ ñí sándáá iní ndíi-áⁿ Yá Ndiöxí xíáⁿ ní cutnùní sá ncháá ñáyiú ío ndëcu cuéchi-yu, chi ñá túú ní cãchicúⁿ nihnú-yu cadá-yu nàcuáa ní quide ndíi. Te sá dúcáⁿ ñí quide ndíi ní sándáá iní ndíi Yá Ndiöxí xíáⁿ ío ní cundáá ndíi núú-gă.

⁸ Te Yá Ndiöxí ní xáhaⁿ-gă xii ndíi Àbrahám sá quée ndíi ñúú núú ndécú ndíi quíhíⁿ ndíi ìngá xichi cundecu ndíi. Te ní quide ndíi nàcuáa ní xáhaⁿ Yá Ndiöxí chi ní quee ndíi cuáháⁿ ndíi núú cuãñaha Yá Ndiöxí cundecu ndíi. Te òré ní quee ndíi núú ndécú ndíi te ñá túú ní cùtnuní iní ndíi ndéé cúú núú cuáháⁿ ndíi cundecu ndíi. Te ducaⁿ ñí quide ndíi chi ní sándáá iní ndíi Yá Ndiöxí. ⁹ Te sá dúcáⁿ ñí sándáá iní ndíi Yá Ndiöxí núú xíáⁿ ní xíndecu ndíi núú ní sãñaha-gă cundecu ndíi, te cuëi ducaⁿ dico ñá túú ní quide ñúú ndíi xíáⁿ. Te ní xóo cundecu ndíi vehe cùtexínu vehe dóó. Te dıu-ni ducaⁿ ñí quide ndíi Isàác ndíhi ndíi Jàcób chi tnàhá cue ndíi-áⁿ ñí cachí Yá Ndiöxí sá ndúú tãhú cue ndíi xíáⁿ cundecu cue ndíi. ¹⁰ Te ducaⁿ ñí quide ndíi Àbrahám chi ní xíndetu ndíi ndéé ní sáá nduu ndùu tãhú ndíi cundecu ndíi núú ndécú Yá Ndiöxí. Te núú ndécú-gă-áⁿ cúú-xí ñúú ní cadúha mee-gă, te ñúú-áⁿ cudíi-xi ni caa ni quíhíⁿ.

¹¹ Te ndíi Sără, sa ní xídó cuíá ndíi sá cóó dëhe ndíi chi sa ní sahnu vîhi ndíi, dico Yá Ndiöxí ní quide-gá te ní xóo ìⁿ déhe ndíi. Te ducaⁿ chi ní sándáá iní ndíi Yá Ndiöxí te ní cutnùní ndáá iní ndíi sá cadá-gă nàcuáa ní xáhaⁿ-gă xii ndíi. ¹² Te cuëi ío ní sahnu ndíi Àbrahám ndíhi ñadíhí ndíi, ndíi Sără

dico dacuití nĩ nduu táhũ-yu ní xóo ìⁿ déhe-yu. Te xíⁿ nũu ío cuéhé ndĩquíⁿ yává ndíi Àbrahám ní cáyá dàtná cuéhé chòdíní ndèé andiu, ndihí dàtná cuéhé ñuhu cúchí làmár, chi ní vǎ yǎo ìⁿ ndacu cahu ñaha xíi-yu sá cuěhě-yu.

13 Te cue ndíi-áⁿ ducaⁿ-ni nĩ sándáá iní cue ndíi Yá Ndiǒxí ndéé ní sáá nduu nĩ xíhí cue ndíi. Te cue ndíi-áⁿ ñà túú ní ndùu táhú cue ndíi quini cue ndíi nchaa nàcuáa ní cachí Yá Ndiǒxí cada-gá, dico ní cutnùní ndáá iní cue ndíi-áⁿ nàcuáa cada-gá núu cuaháⁿ núu vǎxi. Te ío ní cudíí iní cue ndíi, te ní cachí cue ndíi sá dicó-ni ichi yáha cue ndíi ñuyú-a, chi ñá díú ñùyú-a cundecu ducaⁿ cuè ndíi. 14 Te sá dúcáⁿ ndùu tnúhu ní cáháⁿ cue ndíi-áⁿ, xíⁿ ní cutnùní sá cuè ní cue ndíi ingá xichi núu cùndècu cue ndíi. 15 Te ni ñà díú ñùú núu nĩ quee cue ndíi ni cuè ní cue ndíi núhú cue ndíi. Chi núu ducaⁿ ni sàni iní cue ndíi te núhú cue ndíi ni cùu. 16 Dico ñáhá chi cuè ní cue ndíi quíhíⁿ cue ndíi ìⁿ xichi núu vǎha-gá cáá cùndecu cue ndíi. Te núu dúcáⁿ ò-gá váha càa-áⁿ cúu-xí ñùú núu ndécú Yá Ndiǒxí, te sá dúcáⁿ nĩ sàni iní cue ndíi xíⁿ nũu ío váha cùu iní Yá Ndiǒxí càchí-gá sá ñà túú cùcahaⁿ núu-gǎ cúu-gǎ Ndiǒxí cue ndíi-áⁿ, te cùtnuní iní-ó sǎ ndàá sá dúcáⁿ càháⁿ-gá chi ní quide túha-gá ìⁿ xichi núu cùndècu cue ndíi-áⁿ.

17 Te ndíi Àbrahám ní xíndecu ìⁿdíi-ni déhe ndíi ndihí ñadìhí ndíi, te cùtnàhá ní xito ndéé ñáhá Yá Ndiǒxí xii ndíi ní xicáⁿ-gá déhe ndíi, ndíi Isàác cuèndá nduu táhú ñáhá-gǎ xii ndíi. Te ní xáhaⁿ ndíi sá cúu ndùu táhú-gǎ déhe ndíi, te ducaⁿ nĩ quide ndíi chi ní sándáá iní ñáhá ndíi xii-gá. Te sa ndècu túha ndíi sá cuǎñaha ndíi déhe ndíi xii-gá

cuëi mee Yă Ndiöxí ní xáhaⁿ ndăá-gá xii ndíi ¹⁸ sá să cuëndá ndíi Isàác te ngúndecu cue ñaní tnhá ndíi.

¹⁹ Te ducaⁿ ñi quide ndíi Àbrahám, chi ní cutnùní ndáá iní ndíi sá Yă Ndiöxí ndácú-gă dándòto-gá cuëi ñáyiu sa ní xíhí. Te sá dúcáⁿ ñi xáhaⁿ ndíi xii Yá Ndiöxí sá cúú ndùu táhú-gă déhe ndíi, te xiáⁿ cada iní-ó sá sà ní xíhí ndíi Isàác te ní ndoto tucu ndíi ní nucúndecu ndíi ndíhi tătă ndíi, ndíi Àbrahám.

²⁰ Te ndíi Isàác ní xícáⁿ táhú ndíi núú Yă Ndiöxí cuëndá sá cadá vâha-gá cue déhe ndíi, ndíi Jácób ndíhi ndíi Esàú núú cuàháⁿ núú vëxi. Te ducaⁿ ñi quide ndíi chi ní sándáá iní ndíi Yá Ndiöxí. ²¹ Te sa ta cùyatni-ná nduu cùú ndíi Jácób, te ní xícáⁿ táhú ndíi núú Yă Ndiöxí cuëndá cue déhe ñaní ndíi déhe ndíi Chèé. Te yítuu-ná ndíi tatnu ndíi ní chiñuhu ndíi Yá Ndiöxí. Te ducaⁿ ñi quide ndíi chi ní sándáá iní ñáhá ndíi xii-gá. ²² Te cútnàhá sa ta cùyatni vii-nă nduu cùú ndíi Chèé, te ní cachí ndíi sá cuè ñáyiu isràél sáá nduu quèé-yu núú xíndecú-yu-áⁿ. Te ní cáháⁿ tucu ndíi nàcuáa cadá-yu yiqui cùñú ndíi na sàá nduu quèé-yu núú ndécũ-yu-áⁿ. Te ducaⁿ ñi quide ndíi chi ní sándáá iní ndíi Yá Ndiöxí.

²³ Te cútnàhá ní cacu ndíi Moisés te ní chiváha ñaha năná ndíi ndíhi tătă ndíi úní yóó. Te ducaⁿ ñi quide cue ndíi-áⁿ chi ní sándáá iní cue ndíi Yá Ndiöxí. Te ní quide cuëndá cue ndíi-áⁿ sá ïo váha càa ndíi Moisés déhe cue ndíi, te ñă túú ní yùhú cue ndíi nàcuáa ní cáháⁿ tée cùu Faraón sá cáhni-dě cue landú. ²⁴ Te sátá ñi sahnú ndíi Moisés te duuⁿ duuⁿ ní cachí ndíi sá vă cáháⁿ ñáyiu sá dēhe yoco tée cùu Faraón cúú năná ndíi. Te ducaⁿ ñi quide ndíi chi ní sándáá iní ndíi Yá Ndiöxí. ²⁵ Te ducaⁿ ñi quide tucu ndíi chi ní tnhá-gá iní ndíi ndoho ndíi ndíhi nchaa ñáyiu cùu cuendá Yă Ndiöxí dàcúúxí

sã cúdí ìní ndíi cundecu tnaa ndíi ichi cuèhé ichi duha. ²⁶ Chi ní sani iní ndíi sá vãha-gá ndoho ndíi cúcuèhé ñháa cue ñáyiú xii ndíi sá cuendá Yaa quixi ñuyíú-a dàcúúxí sã cundècu ndíhi ndíi nchaa sá íó Ègiptú. Te ducaⁿ ñi quide ndíi chi ní xúhuⁿ iní ndíi sá Yã Ndiõxí cuañaha-gã sá ndúú tãhú ndíi. ²⁷ Te ndíi Moisés ní quee ndíi nacióⁿ Ègiptú te ñã túú ní quide cuendá ndíi sá ío cùdééⁿ tée cùu Faraón núú ndíi. Te ducaⁿ ñi quide ndíi chi ní sándáá iní ndíi Yá Ndiõxí. Te ní quide càhnu iní ndíi cuendá nchaa sá ñi yáha ndíi, te ní quide iní ndíi sá Yã Ndiõxí ndécú ndíhi ñaha túu-gá xii ndíi cuèi ñã túú ní xìní núú ñháa ndíi xii-gá. Te ducaⁿ ñi sani iní ndíi chi Yá Ndiõxí ndécú ndíhi ñaha-gá xii ndíi.

²⁸ Te ndíi Moisés cúú ndíi tée ní tausaha ñi quide vico pàscuá ndíhi cue ñáyiú isràél, te dàvá-áⁿ ñi táúchíúⁿ ndíi ní sahní-yu mbèé te níñí quiti-áⁿ ñi dácánùú-yu yuyèhé-yu. Te ducaⁿ ñi quide ndíi chi ní sándáá iní ndíi Yá Ndiõxí. Te ducaⁿ ñi quide tucu ndíi cuendá sá espíritú sá ñi tendaha Yã Ndiõxí cahni-xi mee-ni dèhe tée déhe díhna cue ñáyiú Ègiptú, te vá cáhni-xí nì ìⁿ déhe cue ñáyiú isràél. ²⁹ Te ndute làmár sá nání Mãr Tícuèhé ní quee dava-xi ní natúu ñuhu yìchí ní níhí ñi yáha cue ñáyiú isràél. Te ducaⁿ ñi cuu chi ní sándáá iní-yu Yá Ndiõxí. Te cue tée Ègiptú tnhá-güedé nchícúⁿ-güedé cuáháⁿ dico ñã túú ní ndàcu-güedé yáha-güedé chi ní ndíhi-güedé ní cáhá.

³⁰ Te cue ñáyiú isràél ní dúcúⁿ ndéé-yu úsá nduu ñuú Jericó te ní ngoyo nchaa sá ñúdòco. Te ducaⁿ ñi cuu chi ní sándáá iní-yu Yá Ndiõxí. ³¹ Te ìⁿ ñaha ní xíndecu ichi díí ìní ní xínani-aⁿ Ràháb, ñaha-áⁿ ñã

túú ní xǐhí-aⁿ dàtná ní xǐhí nchaa ñáyiú ío ní cuu sàá iní-xi núú Yǎ Ndiǒxí, chí ní cuu váha iní-aⁿ núú cuè téé ní tendaha cuè ñáyiú isràél ní sángoto dayuhu ñúú-aⁿ. Te ducaⁿ ñǐ quide-aⁿ chí ní sándáá iní-aⁿ Yá Ndiǒxí.

³² Te núú dìcò sá cúú te cáháⁿ-í cuendá ndíi Gedèón, ndíhi cuendá ndíi Bàrác, ndíhi cuendá ndíi Sànsón, ndíhi cuendá ndíi Jèfté, ndíhi cuendá ndíi Dàvíí, ndíhi cuendá ndíi Sàmúél, ndíhi cuendá nchaa cue téé ní xóo cáháⁿ tnúhu Yá Ndiǒxí ndéé sanaha, te nchaa cuendá cue téé-áⁿ cáháⁿ-í te núú dìcò cùyáchí-í dico ñá túú cùyáchí-í. ³³ Te nchaa cue ndíi-áⁿ ni sándáá iní cue ndíi Yá Ndiǒxí nùu xǐǎⁿ ní xóo ndacu cue ndíi ní xóo nàá cue ndíi ndíhi nchaa ñáyiú dava-gá ñúú. Te nchaa ñáyiú-áⁿ ñà túú ní xóo ndacú-yu nàá-yu ndíhi cue ndíi, te ní xóo cada cue ndíi nchaa nàcuáa tàú-xi cunduu, te ní quide váha ñaha Yǎ Ndiǒxí xii cue ndíi dàtná ní cachí-gá cada ñaha-gǎ xii cue ndíi. Te cuèi nchaa cue quiti dééⁿ ñà túú ní ndàcu-güèdi ná cada ñaha-güèdi xii cue ndíi.

³⁴ Te ní xóo ndacu cue ndíi ní xóo ndahvá cue ndíi ñuhú sá vǎ yǒo tnàhí ndàcu ndahvá, te ní cácu cue ndíi vǎ yǒo ni ndàcu cahni ñaha xii cue ndíi. Te cue ndíi-áⁿ ñà túú ñihí ndéé cuè ndíi ni cùu, dico ní ñihí ndéé cuè ndíi chí Yá Ndiǒxí ní chindee ñàha-gá xii cue ndíi, te nchaa ndíi-áⁿ ïo ní ñihí ndéé cuè ndíi ní nàá cue ndíi ndíhi nchaa ñáyiú ní cuu úhú iní ñàhá xii cue ndíi, te nchaa ñáyiú ducaⁿ ñǐ xóo nàá ndíhi cue ndíi-áⁿ ñà túú ní xóo ndacú-yu nàá ndíhi ñàhá-yu xii cue ndíi chí ní xóo cunú-yu. Te ducaⁿ ñǐ cuu chí ní sándáá iní cue ndíi Yá Ndiǒxí. ³⁵ Te dava ñáyiú ñihí ní nduu táhǔ-yu ní ndoto cue ñáyiú ní xíndecu ndíhi-yu ní nucúndecu ndíhi ñaha tùcú-yu.

Te dava ñáyiú ío ní dándóhó ñàha tñaha ñáyiú-yu

te ní xíhí-yu, dico ñá túú ní dàñá-yu ichi váha nàcuáa cácu nihnú-yu núú tnàha ñáyíú-yu, te ducaⁿ chi ní cuiní-yu sá ndótõ-yu ndéé cuèé-gá nàcuáa ngúndecu váha-yu núú ndécú Yă Ndiõxí. ³⁶ Te dava cue ndíi ío ní ndoho cue ndíi chi ío ní cudíquí ndéé ñáhá ñáyíu xii cue ndíi, te ní canihá-yu xii cue ndíi, te dava cue ndíi ní dácútú ñàhá-yu, te ní chihi ñàhá-yu xii cue ndíi vecaá. ³⁷ Te dava cue ndíi ní sahani ñàhá-yu ndihí yúú. Te dava cue ndíi ní chidava ndáá ñáhă-yu ní xehndé ñáhă-yu ndihí sierrá. Te dava cue ndíi ní xito ndéé ñáhă-yu te núu ndisa sá sàndáá iní cue ndíi Yă Ndiõxí, te dava cue ndíi ní sahani ñàhá-yu ndihí machítí. Te mee-ni ñîi mbéé ndihí ñîi chivá, ní xóo cuu dóo cue ndíi. Te mee-ni ñîi cue quiti-áⁿ ñîi xóo cuu dóo cue ndíi cuèi ndëni ní cuu ní xóo caca cuu cue ndíi. Te mee-ni cuè téé ndàhú ní cuu cue ndíi. Te ío ní xóo dandihú-yu iní cue ndíi, te nándi sá ñîi xóo cada ñàhá-yu xii cue ndíi ní xóo dandòho ñàhá-yu. ³⁸ Te cue ndíi-áⁿ ïo-gá ní xínduu váha iní cue ndíi dàcúúxí nchàa dava-gá ñáyíu. Te nchaa cue ndíi-áⁿ ñîi xica cuu cue ndíi cuèi nchaa núú ñà túú vă yõ tnàhí ndècu, te cuèi xití yucu ní xica cuu cue ndíi. Te ní xóo cada vehe cue ndíi nchaa yaú cava. Te ndëni ní cuu nchii yaú ní xóo cundecu cue ndíi. ³⁹ Te ío ní cudíu cue ndíi núú Yă Ndiõxí cuèndá sá ñîi sàndáá iní ñáhá cuè ndíi xii-gá. Te cuèi ducaⁿ ñîi quide cue ndíi dico ñá túú ní xíní cue ndíi nchaa sá ñîi cachí Yă Ndiõxí cada-gá. ⁴⁰ Te ducaⁿ ñîi cuu chi ñîi sá ïo-gá váha ní cachí Yă Ndiõxí cada-gá. Te sá dúcáⁿ ïo-gá váha ní cachí-gá cada-gá cúu-xí cuèndá nchoo ndihí cuendá cue ndíi-áⁿ cuèndá sá

ñà díú mèe-ni cue ndíi-áⁿ cundáá cue ndíi núú-gă,
chi tnàhá nchoo cundáá-ó núú-gă.

12

Ío cuhuⁿ iní-ó Xítóhó Jesucrístú

¹ Te cue ñáyiú ní xíndecu ndéé sanaha nĩ quidé-yu nàcuáa ní cutnùní sá nĩ sándáá iní-yu Yá Ndiõxí. Te cada iní-ó sã ncháá ñáyiú-áⁿ xíndéhé ñàhá-yu xii-o vitna. Núu xíáⁿ xíní ñùhu-xi sá vã cádá-ó nì ñⁿ sá cuèhé sá dúhá chi ñiú nchaa xíáⁿ quidé-xí ñà túú cundáá-ó núú Yá Ndiõxí. Te vã cádá cuendá-ó nchàa sá quidé tñèñu iní-ó nàcuáa ndacu-o càda-o nchaa nacuáa càháⁿ-gá. Te ío càhnu cunduu iní-ó càchicúⁿ nihnu-o càda-o nchaa nacuáa ní cachí-gá cada-o cundecu-o ñuyíú-a. ² Te ío cuhuⁿ iní-ó Xítóhó Jesucrístú, chi ñiú-gá ní quide ní sándáá iní-ó Yá Ndiõxí, te ñiú-ni ducaⁿ quide-gá cuèi vitna te cuèi ndéé núú cuàháⁿ núú vèxi ñiú-ni ducaⁿ càda-gá sá quíndáá iní-ó Yá Ndiõxí. Te Xítóhó Jesucrístú ío ní quide ndee ñí-gá ní ndoho-gá te ní xíhí-gá núú cùrúxí, te ñà túú ní quide cuendá-gá cuèi ñⁿ sácáⁿ núú cúú-xí sã dúcáⁿ nĩ ndoho-gá. Te ducaⁿ nĩ quide-gá chi sa nàha-gá sá ná yãha sá dúcáⁿ ndòho-gá te ío cudíí iní-gá. Te vitna núcóo-gá xio cùha núú núcõo Yá Ndiõxí te tàxi tnuní-gá.

³ Te xìni ñùhu-xi sá ño cada cuendá-ndó nàcuáa ní quide Xítóhó Jesucrístú chi Yáá-áⁿ ño ní quide càhnu iní-gá nchaa sá nĩ ndoho-gá ní quide ñaha nchàa ñáyiú ndècu ichi cuehé ichi duha xii-gá. Te ducaⁿ càda cuendá-ndó nàcuáa ní quide-gá cuendá sá vã túu dusaⁿ-ndo, te ni vã nátùhú iní-ndó càda-ndo nchaa nacuáa càháⁿ-gá. ⁴ Te nchòhó dáquèe tihú-ndó nchàa sá cuèhé sá dúhá dico vátá

cáhní ñàha-gá-yu xii-ndo sǎ dúcáⁿ quìde-ndo. ⁵ Te ndacu iní-ndó nàcuáa càháⁿ Tǎtá-ó Dǔtú Ndiǒxí dásàhú ñáhá-gǎ xii nchoo cuè ñáyiú cùu déhe-gá. Te duha càchí-gá núú tütú-gá:

Nchòhó cue déhe mee-ĩ, vá cání ìní-ndó sǎ àúⁿ ñǎ cuu dándoho ñaha-í xii-ndo, te ni vǎ nátùhú iní-ndó òré càháⁿ-í dóho-ndo nàcuáa cada-ndo cùndecu-ndo.

⁶ Chi mee-ĩ dándòho-í nchaa ñáyiú cùu iní-í cuendá sá cúndǎá-yu núù-í, te quìde úhú-í-yu, te ñiú-ní-yu cùú-yu ñáyiú càchí-í cúú dēhe-í.

Duha càchí-gá núú tütú-gá. ⁷ Te ío cada ndee ìní-ndó sǎ dúcáⁿ dándoho ñaha Yá Ndiǒxí xii-ndo, chi quìde-gá sá cúú-gǎ Tǎtá-ó. Te ñǎ túú ñi ñⁿ tée cùu tǎtá te cachí-ó sǎ ñǎ túú sànu ichi-dé cue déhe-dé nàcuáa tàú-xi cunduu. ⁸ Te núu Yá Ndiǒxí ñǎ túú dándoho ñaha-gá xii-ndo datná dándòho-gá cue ñáyiú càchí-gá cúú dēhe-gá, te ñǎ díú dēhe mee-gǎ cúú-ndó te núu ducaⁿ, chi cùu-ndo datná cue ñáyiú ñǎ túú cùtnuní yoo cùu tǎtá-xi. ⁹ Te nchoo sà naha-o sá cùtnàhá ní cuu landú-ó ñi sanu ichi ñaha tǎtá-ó nàcuáa tàú-xi cunduu, te ducaⁿ ñi xóo canehe-o sǎ yíñùhu núú-güedē te ñiú-ni ducaⁿ nèhe-o sá yíñùhu núú-güedē vitna. Te núu ducaⁿ ñi sándáá iní-ó tǎtá-ó, te ío-gá xíní ñùhu-xi quíndáá iní-ó Tǎtá-ó Dǔtú Ndiǒxí cuendá ducaⁿ ndùu táhú-ó cùndecu-o ndihi-gá ñi caa ñi quíhíⁿ, chi ñiú-gá cúú-gǎ Yaá ní chihi iní-ó. ¹⁰ Te cùtnàhá ní cuu landú-ó, ñǎ túú títñi nduu ni càniha tǎtá-ó ñi sanu ichi ñaha-güedē xii-o nàcuáa ní cuu iní méé-güedē. Te Yá Ndiǒxí ducaⁿ dándoho ñaha-gá xii-o sànu ichi ñaha-gá cuendá cúú-xí sǎ vǎha sá cúú-xí-ó, te

ducaⁿ quide-gá cuendá nchoo càda ndáá-ó dàtná quidé mèe-gá. ¹¹ Te òré véxi ìⁿ tnúndòho sá cúú-xí-ó te ñá túú cùdí ìní-ó chi dàndihú iní ñáhá-xí xii-o. Te nchaa ñáyiú ngúnu ichi sá cuendá nchaa tnúndòho-áⁿ te ngúita-yu quide ndáá-yu, te ío váha cùu iní-yu ndècú-yu.

Vá dáquèe tihú-ó tnũhu Yá Ndiõxí

¹² Te núu xiãⁿ ío chí ndúcú ndèe-gá canchicúⁿ nihnu-ndo ichi Xítóhó Jesucristú, te vá dícó yica cùu iní-ndó cànchicúⁿ nihnu-ndo ichi-gá. ¹³ Te cada váha-ndo cùndecu-ndo ichi-gá cuendá nchaa ñáyiú sàni ìⁿ sani úú iní-xi níhí ndéě-yu cundecú-yu ichi-gá te vá ná tũhú iní-yu canchicúⁿ nihnú-yu.

¹⁴ Te nducu-ndo nàcuáa cada-ndo cùndecu váha-ndo ndìhi cue tnaha ñáyiú-ndo, te ío cada váha-ndo cùndecu-ndo nacuáa cundáá-ndó nũú Yã Ndiõxí chi núu vá dúcáⁿ càda-ndo te vá ndúú tãhú-ndó cùndecu-ndo ndìhi-gá. ¹⁵ Te ío váha cada cuendá-ndó nàcuáa cada-ndo cùndecu-ndo, chi núu ñáhá te vá chindèe ñaha-gá Yã Ndiõxí xii-ndo. Te ío váha cada cuendá tucu-ndo nàcuáa cundecu-ndo vã cání cuèhé iní-ndó cuendá Yã Ndiõxí, chi núu ducaⁿ na càda-ndo te dava-gá ñáyiú ndècu ndìhi-ndo ichi-gá tnàhá-yu ngúita-yu ducaⁿ càdá-yu, te vá cùndècu váha-gá-ndó ndìhí-yu ichi-gá. ¹⁶ Te cada cuendá tucu-ndo sã vã cùndècu-ndo ichi díí ìní, te ni vã dáquèe tihú-ndó nì ìⁿ sá cúú cuendá Yã Ndiõxí dàtná ní quide ndíi Esáú, chi sá cuãñaha tãtá ndíi-áⁿ nduu tãhú ndíi ni cùu ní dama ndíi ìⁿ cóhó comidá. ¹⁷ Te nchòhó sa nãha-ndo sá cùtnàhá ní cuiní ndíi Esáú cácaⁿ tãhú tãtá ndíi núú Yã Ndiõxí cuendá nchaa sá ndúú tãhú ndíi ni cùu, te ñá túú ní xicáⁿ tãhú tãtá ndíi

núú Yă Ndiöxí nàcuáa cuení méé ndi ni cùu. Te ní ndáhyú víhí ndi, te cuéi ducaⁿ ñi quide ndi dico ñá túú ní ndàcu-gá ndi nàníhí ndi táhú sã ñi dama ndi comidá.

¹⁸ Te cue ñáyiú isràél ní sátuhá-yu ñⁿ yucu núú càyú ñuhú, te nchòhó ñá túú ndéé ducaⁿ sàháⁿ tuha-ndo ñⁿ yucu núú càyú ñuhú dàtná ní quide cue ñáyiú-áⁿ. Te cútnàhá ducaⁿ ñi sátuhá-yu yucu-áⁿ te ní cunee víhi níhí yucu-áⁿ, te ní quene táchí ñi. ¹⁹ Te ní tecú dóho-yu ní cáháⁿ ñⁿ cútú, te ní tecú tucu dóho-yu ní cáháⁿ Yă Ndiöxí ní cáháⁿ ndi ñaha-gã xií-yu. Te nchaa ñáyiú ní tecú dóho-xi ní cáháⁿ-gá te ní cuini-yu sá vã càháⁿ-gá. ²⁰ Te ducaⁿ ñi quidé-yu chi ñá túú ní cùndee iní-yu nàcuáa ní cáháⁿ-gá, te duha ní cachí-gá: “Te cuéi ñⁿ qui^{ti} nà yáha xi^{ti} yucu-a, te cahni-ndo-di ndi yúú àdi ndi ñⁿ yutnu puyá”, duha ní cachí-gá. ²¹ Te sá dúcáⁿ ñi quide-xi ní xiní-yu xiáⁿ ío ní dáyùhú ñáhá-xí xií-yu. Te tnàhá té Moisés ní yùhú-dé, te ní cachí-dé: “Qui^{di} ñaha-xi xii-í sá yùhú-í”, duha ní cachí-dé.

²² Te nchòhó, ñá túú quide-ndo datná ní quide cue ñáyiú-áⁿ ñi sàháⁿ tuhá-yu yucu-áⁿ, dico cada iní-ndó sã sà ní tuha-ndo yùcu Sión sá ndécú núú ndécú Yă Ndiöxí, ndi ñuú-gá ñuú Jerusàlén sá cáá àndi te diu-gá cúú-gã Yaá ndécú nchaa nduu nchaa quiú. Te diu-ni xiáⁿ xĩndecu cuéhé víhí cuè espíritú xínú cuèchi núú-gã ²³ chíñùhu ñaha-xi xii-gá. Te nchòhó cúú-ndó cuè ñáyiú cùu cuendá Yă Ndiöxí, te ní tnàhá tnùhu-ndo ndi nchaa dava-gá ñáyiú cùu cuendá-gá, ñáyiú yòdo tnuní núú tütú-gá ndécú àndi, te diu-ni ñáyiú-áⁿ cuãñaha-gã xií-yu sá

ndúú tǎhǔ-yu. Te nchòhó ní tuha-ndo Yǎ Ndiǒxí Yaá cada ndáá yí cá cuěchi nchaa ñáyiu. Te cada iní-ndó sǎ ñí tnahá tnúhu-ndo ndìhì cue ñáyiu ní quide ndáá ní xíndecu ichi Yá Ndiǒxí ñuyíú-a. Te ñáyiu-áⁿ ñà túú tnàhí-gá ná cúmǎñí-yu vitna ndècú-yu núú-gǎ. ²⁴ Te ní tnahá tnúhu-ndo ndìhì Xítóhó Jesucrístú Yaá ní quide nàcuáa cada Yá Ndiǒxí ìngá núú sǎ vǎha sá cúú-xí nchàa nchoo ñáyiu ndècu ñuyíú-a, chi ní satì níñí-gǎ te ní xíhí-gá núú cùrúxí. Te níñí Xítóhó Jesucrístú ñá túú ìⁿ-ni cuu-xi ndìhì níñí ndíi Àbél, chi ðu cuendá níñí-gǎ-áⁿ ñí quide càhnu iní Yǎ Ndiǒxí nchaa cuéchi-o.

²⁵ Núu xǎⁿ ío cada cuendá-ndó vǎ dáquèe tihú-ndó tnúhu càháⁿ Yǎ Ndiǒxí, chi nchaa ñáyiu ní xíndecu ndéé sanaha dùcaⁿ ní quidé-yu ní dáquée tǎhǔ-yu tnúhu ní cáháⁿ-gá ñuyíú-a sá cúú-xí-yu. Te ñá túú ní cǎcu-yu chi ní nacháhu-yu sá dúcáⁿ ñí quidé-yu. Te uuⁿ-gá tucu nchoo chi vá cǎcu-o te núu ducaⁿ na dàquee tihú-ó tnúhu càháⁿ Yǎ Ndiǒxí ndéé andiú sǎ cúú-xí-ó. ²⁶ Te cútnàhá ní cáháⁿ Yǎ Ndiǒxí ndéé sanaha te ní quidi-xi ñuyíú. Te vitna càchí-gá: “Yúhú quidi tucu-í ìngá xito ñuyíú, te ñá díú mèe-ni ñuyíú ducaⁿ quidi-í chi tnàhá andiú quidi-í”, càchí-gá. ²⁷ Te sá dúcáⁿ càháⁿ-gá sá ìngá xito tucu ducaⁿ càda-gá xǎⁿ cútnùní sá ncháándì túhú sá tǔu ndèhe-o danaa-gá. Te nchaa sá ñà túú ndéé tǔu quini-ó ñuyíú-a xǎⁿ vá quídí-xí te ni vǎ náá-xí. ²⁸ Te núú ñí cachí Yǎ Ndiǒxí nduu táhú-ó cùndecu-o chi mee-gǎ táxí tnùní-gá xǎⁿ, te ni vǎ quídí-xí te ni vǎ náá-xí. Te xǎⁿ ío xìni

ñuhu-xi ndacáⁿ táhú-ó nǔú-gă, te yiñùhu yiñuhu cunu cuechi-o núú-gă nàcuáa cuu váha iní-gá, te ducaⁿ cùhuⁿ iní-ó sǎ ìo cǎhnu cuu-gá. ²⁹ Te Tátá-ó Dǔtú Ndiǒxí cúú-gă dàtná ìⁿ ñuhú chi danàa-gá nchaa sá ñà túú quìde nacuáa cuu váha iní-gá.

13

Nàcuáa tàú-xi cada-o cuendá cuu váha iní Yǎ Ndiǒxí

¹ Te nchaa nchòhó ñáyiú ndècu ichi Xítóhó Jesu-cristú, vá dáñá ndèé-ndó cùu iní tnáhá-ndó nàcuáa ndècu-ndo ichi-gá. ² Te cunaha-ndo sǎ nǔu ìó ñáyiú ñùhu ichi ní quexìó-yu vehe-ndo te cuañaha-ndo vèhe ndetatú-yu, te cuañaha-ndo sǎ cǎxǐ-yu. Chi davá-yu ndéé espíritú xínú cuèchi núú Yǎ Ndiǒxí ní sáháⁿ vehé-yu ní queheⁿ cuendá-yu te ñá túú ní cùtnuní iní-yu sá díú espíritú xínú cuèchi núú-gă cúú-xí.

³ Te ndacu tucu iní-ndó cuè ñáyiú xìxíhi vecaá, te cada iní-ndó sǎ tnáhá-ndó yìhi-ndo vecaá ndìhí-yu. Te ndacu tucu iní-ndó nchàa ñáyiú ìo ndòho, te cada iní-ndó sǎ tnáhá-ndó ndòho-ndo ndìhí-yu.

⁴ Te nchaa ñáyiú na cǎchí-yu sá ìⁿ sá vǎha cùu-xi sá ìⁿ téé ndìhi ìⁿ ñadìhí ná nìhí tnáhǎ-yu candeca tnáhá-yu. Te nchòhó cue téé vá cání ìní-ndó cǎháⁿ ndìhi-ndo ñadìhí te núu ñá díú ñadìhí-ndó cùú-yu. Te ducaⁿ-ni nchòhó cue ñáyiú dìhí tucu vá cání ìní-ndó cǎháⁿ ndìhi-ndo téé te núu ñá díú yì-ndo cuu-güedé, chi Yá Ndiǒxí dandòho-gá nchaa ñáyiú ndècu ichi díí ìní.

⁵ Te vá cúhúⁿ ìní-ndó mèe-ni díhúⁿ. Te núu nándi cùu nchaa sá ndécú ndìhi-ndo te diu-ni nchaa xǎⁿ

sa nduu vétú iní-ndó, chi Yá Ndiöxí ní cachí-gá: “Ni ñⁿ nduu vá dáñá ñihnu ñaha-í xii-ndo, chi nchaa-ni nduu chindee ñaha-í”, duha ní cachí-gá. ⁶ Te xíãⁿ núu nchoo ñè yuhu ñi iní-ó cãháⁿ-ó ñⁿ ñⁿ-o, te cachí-ó:

Yá Ndiöxí cúú-gã Yaá chíndèe ñaha xii-í,
núu xíãⁿ ñá túú yùhú-í cuèi náñdi càháⁿ ñáyiú cada ñàhá-yu xii-í.

Duha cachí-ó.

⁷ Chí ndácú ñí cue téé ní sanu ichi ñaha xii-ndo ichi Xítohó Jesucristú cue téé ní cáháⁿ tnúhu Yá Ndiöxí núú-ndó, te ío váha chí nácuãha cuendá nàcuáa ní quide nchaa cue téé-áⁿ ñí xíndecu-güedé ndéé ní sáá nduu ñí xíhí-güedé. Te ío quindáá iní-ndó Yá Ndiöxí dàtná ní xóo cada cue téé-áⁿ.

⁸ Te dàtná-ni ní quide Xítohó Jesucristú ndéé sanaha ñi-ndu ñi ducaⁿ quide-gá vitna, te ñi-ndu ñi ducaⁿ càda-gá ndéé núú cuàháⁿ núú vëxi. ⁹ Te vá dáñá-ndó mèe-ndo dandahú ñàhá ñáyiú dacàháⁿ ñàhá xii-ndo natuha-ndo ingá ichi, ñáyiú dànehé tnàha ñáyiú-xi náñdi sá ñí cutúha-yu, te nchaa xíãⁿ ñá túú ñⁿ-ni cáháⁿ-xi ndíhi tnúhu sá ndécú ndíhi-ndo. Te Yá Ndiöxí chíndèe ñaha-gá xii-o nàcuáa níhí ndéé-ó cùndecu-o ichi-gá, te ducaⁿ te cuu-xi sá vãha sá cúú-xí-ó, te ñá díú cuendá ñⁿ sá xéxi-ó ñíhí ndéé-ó ndècu-o ichi-gá. Te dava ñáyiú càchí-yu sá dává núú comidá cuu caxi-o te dava ñàhá nàcuáa níhí ndéé-ó cùndecu-o ichi-gá, dico ñá ndáá sá sã dúcáⁿ vã caxí-ó nchàa núú comidá níhí ndéé-ó cùndecu-o ichi-gá.

¹⁰ Chi Xítohó Jesucristú ní xíhí-gá cuendá-ó núú cùrúxí, te nchaa ñáyiú nchìcúⁿ ñihnu-ni quide nchaa nacúáa ní quide nchaa dútú ñí xinu cuechi

núú Yă Ndiöxí ndéé sanaha, ñáyiú-áⁿ vǎ cúú tnàhá tnúhu-yu ndìhi Xítóhó Jesucrìstú Yaá ní xíhí núú cùrúxí sá dúcáⁿ quidé-yu. ¹¹ Chi dútú cúnùu-gá ní xíndecu ndìhi cue ñáyiú isràél, téé-áⁿ ñí xóo canehe-dé níñí nchaa quiti ní xóo cahni-dé ní xóo quíhu ndéé xití cuártú ní cuu íi-gǎ. Te ducaⁿ ñí xóo cada dútú-ǎⁿ cuèndá cada càhnu iní Yă Ndiöxí nchaa yíca cuèchi ñáyiú, te cuñú nchaa quiti-áⁿ ñí xóo cahmi-güedé ìⁿ xio yuhu ñùú. ¹² Te ducaⁿ ñí yáha Xítóhó Jesucrìstú chi ndéé ìⁿ xio yuhu ñùú ní sahani ñaha-güedě xii-gá. Te cuèndá níñí-gǎ sá ñí sati núú cùrúxí núú ñí xíhí-gá, ní nduu ndoo ní nduu nine iní cue ñáyiú sàndáá iní ñáhá xii-gá. ¹³ Te vitna chí ná tùha-o Xítóhó Jesucrìstú te cada ndee ìní-ó ndòho-o datná ní ndoho-gá. ¹⁴ Te ñuyíú-a ni ìⁿ xichi ñá túú ndéé cáá ìⁿ ñuú cudíi ni caa ni quíhíⁿ cuèndá cundecu-o, dico ducaⁿ-ni ñùhu iní-ó ìⁿ xichi núú ndúú tǎhú-ó cundecu-o ni caa ni quíhíⁿ.

¹⁵ Te núu xǎⁿ xíní ñùhu-xi sá vǎ dáñá ndéé-ó chĩñuhu-o Dútú Ndiöxí chi Xítóhó Jesucrìstú ní quide-gá nàcuáa ndacu-o tnàhá tnúhu-o ndìhi Yá Ndiöxí, te òré càháⁿ ndìhi-o-gǎ te nuu núu ndacáⁿ tǎhú-ó nǔú-gǎ. Te nchaa tnúhu càháⁿ-ó òré càháⁿ ndìhi-o-gǎ cúú-xi dàtná ìⁿ tǎhú sǎ cúú-xí-gǎ. ¹⁶ Te vá dáñá ndéé-ndó càda-ndo mee-ni sá vǎha cundecu-ndo, te ducaⁿ chĩndee tnaha-ndo ìⁿ ìⁿ-ndo ndìhi sá ndécú ndìhi-ndo. Te núu ducaⁿ na càda-ndo te caní iní-ndó sǎ cúú-xí dàtná ìⁿ tǎhú sǎ ïo vǎha cùu iní Yă Ndiöxí.

¹⁷ Te quindáá iní-ndó càda-ndo nchaa nacuáa càháⁿ cue téé yìndaha ñaha xii-ndo nacuáa ndècu-ndo ichi Xítóhó Jesucrìstú, chi ñiu cue téé-áⁿ

quidé cuendá ñáhá-güedě xii-ndo nàcuáa cundecu váha-ndo núú-gă. Te sáá nduu nàcani tnúhu-güedé núú-gă núú ní quide váha-güedé àdi ñá túú ní quide váha-güedé ní xíndecu ndihî ñaha-güedě xii-ndo. Te núú ducaⁿ na càda-ndo quindáá iní-ndó-güedě te cudíí iní-güedé cundecu ndihî ñaha-güedě xii-ndo, te vá ndìhú iní-güedé. Te núú vá dúcáⁿ càda-ndo te vá cúú-xí sã vãha xii-ndo nchàa sá quidé-güedě sá cúú-xí-ndó.

¹⁸ Te càháⁿ ndàhú-í núú-ndó sã cãháⁿ ndihî-ndo Yã Ndiõxí cuendá-ndí. Te nchúhú cùtnùní ndáá iní-ndí sá ñà túú nã cúmãní-ndí núú Yã Ndiõxí, te ducaⁿ chi ndùcu-ndí nàcuáa quide-ndí cundáá-ndí núú-gă. ¹⁹ Te càháⁿ ndàhú tucu-í núú-ndó sã ïo cãcáⁿ táhú-ndó núú Yã Ndiõxí cuendá sá mée-gă ná cáda te ío ndíhî quixi coto ñaha tùcu-í xii-ndo.

Tnúhu ndéé núú nî ndihî-ná

²⁰ Te Yã Ndiõxí Yaá quidé cùu váha iní-ó ndècu-o, Yaá-áⁿ nî dándótó-gă Xítohó Jesucrìstú. Te Xítohó Jesucrìstú-áⁿ cúú-gă dàtná ìⁿ toli ío-gá quéné cãva xìto mbéé. Te ducaⁿ sãtnahá-xi cùu-gá cuendá sá nî sati níñí-gă te ní xíhí-gá, te ducaⁿ nî cuu cuendá sá nî quide ndáá-gá ndihî Yã Ndiõxí sá cáda-gă ìngá núú sã vãha sá cúú-xí nchòo cue ñáyiu ndècu ñuyíú-a. Te nàcuáa ní quide ndáá-gá ndihî Yã Ndiõxí te ñiu-ni ducaⁿ càda-xi núú cuaháⁿ núú vèxi. ²¹ Te xìcáⁿ táhù-í núú Yã Ndiõxí sá mée-gă ná chìndee ñaha-gá xii-ndo cuendá cada-ndo mée-ni sá vãha nàcuáa cuìní mée-gă, te mee-gă ná cáda ñaha-gá xii-o nchàa sá vãha sá sání iní-gá. Te ñiu-ni ducaⁿ na tàuchiuⁿ-gá cada Xítohó Jesucrìstú sá cúú-xí-ó, duha xìcáⁿ táhù-í núú-gă. Te vitna

nchaa-o chí ná cächí-ó sǎ ǐo cǎhnu cuu Xítohó Jesucristú ni caa ni quíhíⁿ. Te ducaⁿ na cùnduu.

²² Te cǎháⁿ ndàhú-í núú nchòhó ñáyiu ndècu ndihí-í ichi Xítohó Jesucristú sá cǎdá cǎhnu iní-ndó nàcuáa ndùu nchaa tnúhu cǎháⁿ-í dásàhú ñáhà-í xii-ndo, chí ñá túú vǎi tnúhu chìdo tnuní-í núú tütú-a sá cúú-xí-ndó.

²³ Te cǎchí tnúhu-í xii-ndo sǎ tǎ Timùteú téé ndècu ndihí-o ichi Xítohó Jesucristú ní cǎcu-dé ñá túú-gǎ yíhí-dě vecaá. Te núu na quèxio ndíhí-dé núú ndécù-í te quixi-í ndihí-dé núú ndécú-ndó quìxi coto ñaha-ndí.

²⁴ Te cúñaha-ndo sǎ ǐo na cǎda ndee iní nchaa cue téé yìndaha ñaha xii-ndo nacuéa ndècu-ndo ichi Yá Ndiǒxí. Te ducaⁿ cǎñaha tùcu-ndo xii nchaa ðava-gǎ ñáyiu cùu cuendá-gǎ sá ǐo na cǎda ndee iní-yu. Te cue ñáyiu nàcióⁿ Itàliá ñáyiu ndècu ndihí-o ichi-gǎ cǎchí-yu sá ǐo cada ndee iní-ndó.

²⁵ Te Yá Ndiǒxí ǐo na chìndee chitúu ñaha-gǎ xii-ndo nchàa-ndo. Te ducaⁿ na cùnduu. Te ǐo chí cǎdá ndèe iní-nǎ vitna.

Tnúhu ní cáháⁿ yá ndiöxí xito cùu uú
New Testament in Mixtec, Peñoles (MX:mil:Mixtec,
Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

872f7754-0986-5ecd-a059-925a708a6939